

SAN MARCOS Jaayhui'my Jadu'n Nej Jesucristo Ytun Yjajtì

¹ Jadu'n oga'ñ chondacy je oybi ayuc tiy'ajt jadu'n nej Jesucristo, je Dios y'ung ytun etz yjajtì.

² Je Dios y'ayucnajtzcaxhiybi je Isaías jecy'ajty jayhui'my jadu'n nej Dios nimay je Cristo:

Nguexaamyich ìch ngogapxy jayijp ma nidüg nidüg cajp ma müch mnicxa'ñ jac'axam, jigix jëb je cogapxy nimähuipy je jäy ajcxy co huen nayñi'ixiiyigixy ma yjot yhuinma'ñ mïd müch ycixpi, jadu'n nipaady nej jihuïy jäy ajcxy ni'ixiy tü'aa co tüg rey yjäda'ñ.

³ Nañ jadu'n jadüg it Isaías jayhui'my jada ayuc ma jadu'n ymïnañ:

Jim mïjtigïduum jäy ajcxy midoy co tüg jäy y'ayuccapxhuäcxy, jadu'n ymïnañ:
“Nayñi'ixiiyigix ma mjot mhuinma'ñ ajcxy jaydëb naybaatim mïd ajt nHuindzin Dios. Ixmájtzcixy yi mjibicjot mjibic-huinma'ñ. Jadu'n nipaady nej jäy ajcxy yajtiy tü'aa huïdibi ooy y'adijy y'a'och.”

⁴ Jim mïjtigïduum anajty Juan je Bautista miñ e ytigiiy mayjäy yajnibejtpi. Chi Juan capxhuäcxy Dios y'ayuc ma je mayjäy ajcxy huïdibi anajty mimb nibejtp. Juan ayuc capxhuäcx co copicy co jäy ajcxy huen jothuimbíjtcixy etz ixmájtzcixy ajcxy je yjibichuinma'ñ, etz nibejtcixy, jigix jëbi Dios yhuinmecxib ajcxy ypocy. ⁵ Tüg'óciy je

mayjäy ajcxy huídibi anajty tzinaayb jím Judea ñaaxjot etz jím Jerusalén mimb anajty ajcxy ma Juan, e y'amídooy'ijty anajty ajcxy je'y'ayuc. Co je jäy ajcxy capxpídzimy nej anajty ypocytúngixy, chí Juan yajnibejty ajcxy ma je Jordán mijñi.

⁶ Juan hue' anajty yhuít'ajtpy camello nibijc, e nañ jeyim anajty muid ñayhuññiyii, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e yminañ:

—Íich jayijp tí nmiñich ngapxhuäcxy Dios y'ayuc. Jac'axam minipy tüg jäy huídibi jacñigi mic'ajt muidity ca'ydi ñich, ca' xypaadyich nicxy nguejyich yí' ycighuin. ⁸ Íich tí nyajñibetyich miich ajcxy muid nií. Per je jäy huídibi yjacmuid Dios ymic'ajt, ca'ydi ñich. Yí' xyaj'adigihuip xyajjotigihuip Dios yjihuiñ ymic'ajt, jadu'n nipaadip nej jihuiy xyajñibedip muid Dios yjihuiñ ymic'ajt.

Co Jesús ñibejty

⁹ Je huin'it xii huin'it tiempo Jesús chooñ ma je cajp huídibi yxii Nazaret, jím Galilea ñaaxjot, e ymiñ ma Juan el Bautista anajty yajpaady. Huin'it xii Juan yajnibejty Jesús ma je Jordán mijñi.

¹⁰ Pídzimb anajty Jesús ma je mijñi, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty, e ycidägy ma yí'. Jadu'n je Espíritu Santo yquëxígy anajty nej tüg muuxy.

¹¹ Chí Jesús midooy capxy ayuc choñ tzajpjoty, nimäyii:

—Íich miich n'ung'ajtpy. Ooy ñich miich ndzocy njihuíy. Ooy jotcuyc najjihuiyijich muid miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajnicxy Jesús mǎjtǎgǎduum. ¹³ E hue' Jesús yhui'miy jim mǎjtǎgǎduum huixchǎguǎpx xǎi ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypuǎgǎi'y je Jesús.

Jesús ytungyajtzondägy jim Galilea

¹⁴ Ti anajty Juan yajpidägy pujxtǎgoty, jac'axam Jesús ñicxy jim Galilea. Jim Galilea Jesús capx-huäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xǎi je tiempo yhuaad'ajtni. Ti nigoody je xǎi je tiempo mina Dios pidäga'ñ yi' y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjǎbicjot mjǎbic-huinma'ñ. Mǎbicccix Dios y'ayuc jadu'n nej jǎb ajcxy m'alma ñǎdzögǎpy.

Jesús huodzoñ mǎdaax jäy huiǎibi anajty acx-majtzp

¹⁶ Jesús huiǎijtp anajty ma je mejypa' huiǎib yxǎi Galilea mejy, co oy'ijxpaady Simón etz y'uch Andrés. Simón etz Andrés acxmadziñ anajty ytung'ajtpy, ytipǎdacpy anajty y'acxmadzi'ñ mejyjoty co ajcxy Jesús ijxpaty. ¹⁷ Chi Jesús nimay Simón etz Andrés:

—Min müǎd ñich. ñich miich ajcxy huingbi tung nmöhuǎpy. Jadu'n mdung nipaadǎp nej jǎhuǎy mjǎymǎjtzcixǎpy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy müǎd Jesús.

¹⁹ Chi Jesús yjacyöy anajty hueen, e ijxpaty Jacobo etz y'uch Juan, je Zebedeo ajcxy ymang. Je

Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen nicxy miiid yi'. Mic'amy je' ajcxy ixmajch yteedy, je Zebedeo, barcojoty miiid ytumbi, chi ajcxy ñicxy miiid Jesús.

Tüg jäy huidibi anajty jibic espíritu miiid

²¹ Huin'it Jesús miiid ymigügtijc yja'ty jim Capernaum. Je huin'it sábado, je pooxín xii, Jesús ytigiiy ma je judíojäy ajcxy ñaymujctac jim Capernaum, chi yjäy yaj'ixpijctzondacy. ²² Je mayjäy ooy ajcxy jihuiy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpijcy jadu'n nej jihuiy yci'm'ané'min miiidity. Ca' Jesús anajty yaj'ixpijcy jadu'n nej je jäy ajcxy huidibi yaj'ixpijcp anajty Moisés ycötújcín je jécycp. ²³ E ma je naymujctac tüg yëydijc huidibi miiid anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayiy iich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyichi? Iich n'ijxajpy miich, e nejhuuuybich co miich je' je Huätzpi Dios.

²⁵ Chi Jesús ix'ojoy je ca'oybi, e nimay:

—Amon miich, e pidzimb ma jada yëydijc.

²⁶ Huin'it je ca'oybi yajyajch yajquidy je yëydijc, e mic yaaxqueegy, e ypidzimy ma je yëydijc.

²⁷ Tüg'ócay je mayjäy jiiby ma je naymujctac ooy ajcxy ñay'adzigiüy, e ñayñimaayi ajcxy miñ xyipy:

—¿Ti jada' yi'? Jada yëydijc ymiiid jemybi ixpijcin. Yi' miiid mic'ajt etz ane'm'ajt, paady ycixpi yi' ane'my yi' ca'oybi, e ycapxmidoohuip.

28 Míc'amy je mayjäy ajcxy huídijaty tzinaayb ma tüg tüg cajp jim Galilea nejhuíy ajcxy nej Jesús ytuñ, e cōmaaygíxy Jesús.

Jesús yajtzögy Simón Pedro ymíd töxyjäybi

29 Tim huin'ítíy Jesús ypidzimy ma je naymujctac, chi ñicxy miid Jacobo etz Juan jim ma Simón etz Andrés ytíjc. 30 Simón ymíd töxyjäybi píjçip anajty. Cíjx'am anajty y'ity, e mic anajty ooy ytoyíi. Tim huin'ítíyí Jesús ñímaayí co Simón ymíd ooy mic ypiçyíi. 31 Chi Jesús nimíjhuägy je pa'mjäy. Chi majtzi yci', e huijtzígy. Tim huin'ítíy yí toyíi y'ixmajtzi, e chi yajcay yaj'uucy Jesús etz ymígügtíjc.

Jesús yajtzögy may pa'mjäy

32 Co xii oy ycidacni, e chuu'íyñi, chi je mayjäy miid miñ ajcxy ma Jesús tüg'óciy pa'mjäydíjc, etz huídijaty ajcxy ca'oybi ymíid. 33 Tüg'óciy je mayjäy ajcxy ma je jimbi mij cajp nimujcy je tíjc ma Jesús anajty ti yjättägy. 34 Jesús yajtzoctay tüg'óciy je may pa'mjäy huenytímytiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixíy nicxy je ca'oybi ñigapxyíi, com y'ixy'ajttaayb anajty ajcxy Jesús.

Jesús y'ayuc tíy'ajt capxhuäcxy jim Galilea

35 Tim mooñi Jesús ymaybídígy, ca' anajty yximíyñi, e ypidzimy ma je cajp. Chi ñicxy ma tüg mijtígíduum Dios mibíjctzoobi. 36 Huin'it je Simón etz je ymígügtíjc ooy ajcxy ja'íjxtäy Jesús. 37 Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

38 Chi Jesús nimay Simón etz je ymígügtíjc ajcxy:

—Tzoc ajt jámim ma yí jacjadyii cajp huinduy agonbi, jaydëb ngapxhuäcxibich Dios y'ayuc nañ jadu'n ma yí jáy ajcxy jim. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jáy nübützpa'mmüdpí

⁴⁰ Tüg jáy huidibi ymüid anajty jibic pützpa'm, je micpi, chi nimijhuägy Jesús, e ycojxtinay'ahuüy ma Jesús yhuinduu, ymínañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ymínañ:

—Ndzojcpyich, cham nyajtzögy.

⁴² Co Jesús jadu'n ymínañ, chi mic'amy je jáy huidibi anajty müid je jibic püdz chögy.

⁴³⁻⁴⁴ Mic'amy Jesús ycapxcíjxy müid je jáy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jüby ma Dios ytijc ma je judío teedy ajcxy, e mo' Dios yhuindzigí'ñ jadu'n nej Moisés ycötújcín ane'my, jigix jëbi huädz mbidzimipy ma Dios ycötújcín. Cuydun miich huidibi Moisés ñajtz'ane'müy jecy'ajty, jigix jëbi je mayjäy ajcxy nejhuühuip co ti mdzögy.

⁴⁵ Per je yëdijc ca' capxymídoy Jesús. Co ñicxy, chi ytigüy capxy yajyöybi jadu'n nej anajty ti yajtzögyii. Com je mayjäy nejhuüyb huidibi anajty Jesús ti tuñ, paady ycixpi Jesús ca' anajty ocjajtni nej ytigühuipy ijxna' jigüe'xna' majaty cajp.

Hue' anajty huıdity ma ca' pın chinäy. Per miñ anajty y'oy'ixyii huenytımypınjäyıtı, chooñ ma nidüg'ócıy cajp huınduy agonbi.

2

Jesús yajtzögy tüg jäy cıma'tpı tecyma'tpı

¹ Ti anajty xii tiempo ñajtznıncxııyñi co Jesús yhuimbijty jadüg'oc jım Capernaum. Je mayjäy ñejhuııyb anajty co Jesús yajpaady ma tüg tijc. ² Chi mic'amy mayjäy ñayyöymujcı ma anajty Jesús yajpaady, e ca' anajty tigıydac ma je tijc, miıd co tzach mayjäy anajty ti miıngıxy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'ıt xii, midaax yeydıjc cıymiñ cıjx'am ma Jesús yajpaady tüg pa'mjäy huıdibi ycı' ytecy ti yxujxtäy anajty. ⁴ E com ca' anajty ni nej y'oyıy nej yajjädıp ajcxy ma Jesús je pa'mjäy, je' co anajty chach újtızıty je tijc miıd je mayjäy, chi ajcxy yajcöhuaach hueeni je tijcñıcx ma anajty Jesús yajpaady. Chi ajcxy cödıyñajxy je pa'mjäy cıjx'am. ⁵ Co Jesús ijxy je jäy ajcxy ymıbíjcin, chi nımay je pa'mjäy:

—Mıgügıch, yı mbocy ti yajhuınmecxtäy.

⁶ Per nijėjıty huındzındıjc huıdibi ajcxy nijaydutp anajty Dios ñecy co ajcxy mıdoy nej Jesús ymına'ñ, chi ajcxy ymına'ñ jotjoty huınma'ñyoty: ⁷ “¿Nej co jada jäy jadu'n ymına'ñ co ti yajhuınmecxy jada pa'mjäy ypocy? Capxtıgooyb yı' miıd Dios. Com ca' nıpınjäy jėb ypocyhuınmecxy. Tügpaıc Dios yı' huıdibi jėb ypocyhuınmecxy.” ⁸ Per Jesús ñejhuııyb anajty nej je' ajcxy chachmına'ñ jotjoty huınma'ñyoty, paady mic'amy ymına'ñ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yi pa'mjäy: “Ti mbocy yajhuinmecxytäyi.” O jac'ooy co nnimähuibich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmīnañ:

—Jadachambi janchtiy nyajquëxigañich co ñich, je jäy huidib tzoon tzajpjoty, e huidibi cham yajpaady ya naaxhuiñ, nmīdich mic'ajt jaydëb nhuinmecxyich jäy ypocy.

Co Jesús jadu'n ymīnañ, chi nīmay je pa'mjäy huidibi yci' ytecy anajty xuxy:

¹¹ —Ñich miich yam jadu'n nīmäy: “Tinayig, yajpidig yi mmabejt e nicx ma mdijc.”

¹² E mic'amy je pa'mjäy ypidigy, e yajpidigy ymabejt, chi ytüyöychoñ jiiby ma je mayjäy ajcxy anajty y'ixy yhuindicxy. Paady ycixpi tüg'óciy je mayjäy ooy jihuīy huinmay etz jäymejch ojadaity ajcxy Dios, ymīnaangixy:

—Nimīnaabi ajt jadu'n nga'íjxim mījhuinmañ jadu'n nej cham ti n'íjxim.

Jesús nīmay je Leví: “Pajamgich”

¹³ Chi jadüg'oc Jesús ycajppidzīmy, ñicxy jim ma mejypa'. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ñāayb anajty ma je yajcogüejttac jäy yajcogüejtp anajty. Chi Jesús nīmay Leví:

—Pajamgich.

Tim huin'ítīy Leví ytīnayīgy, ixmajch ytung, e panīcxy Jesús.

15 Jadu'n yjajti co tüg xii Jesús caayb anajty me Leví ytijc. Mayjäy huiðibi ytung'ajtpy anajty yajcogüedi, etz jacjadyii jäy huiðibi anajty tundigooyb miid judío jäy ycostumbre y'iñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huiðijtcixy. 16 Jim anajty ma Leví ytijc nijëjity fariseojäy, je huindzindijc huiðibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huiðibi tundigooyb miid judíojäy ytiy'ajt ycötújcín, etz yajcogüejtpidijc, chi ajcxy migapxy Jesús ydiscípulos, je' ajcxy huiðibi mijnicpejtp anajty Jesús, nimay ajcxy:

—¿Nej co Jesús miich ajcxy mHuindzín ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huiðibi tundigooyb miid judíojäy ycötújcín?

17 Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzozdumbi yi jäy ajcxy huiðibi mic'ajtp oy'ajtp. Yi' janchtiy yi huiðibi ajcxy yuuba'm ymiid chojcpy ajcxy tzozdumbi. Nañ tim jadu'n yi jäy ajcxy huiðibi ca' ypocymiidity, ca' ajcxy tzocy pocyhuinmeecxín. Hich ti nmiñich co nyajjothuimbidipyich pocyjäydijc. Hich ca' ti nmiñich co nyajjothuimbidipyich oyjäydijc tudägyjäydijc.

Jesús yaj'amidoogixy nej co jäy y'ity jaygay

18 Jadu'n yjajti tüg tiempo ayuu'ijtp anajty je jäy ajcxy huiðibi mijnicpejtp anajty Juan je Bautista.

Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huídibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huídib miich xymijnicxpejtp, ca' y'ayuu'ájtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ñich ndiscípulos ajcxy y'ayuu'adip. Jadu'n nipaady nej jäy ajcxy huídibi píjcin nixidumy ca' ajcxy y'ayuu'aty ma yam yi píjcin nixiduñ, e peni ca'ni je píjcpí ymígügtijc y'ixmajztäyíi. Nami je píjcpí ca'ni choñ, chi ca' pín y'ayuu'adañ huídibi nixidum je píjcin. ²⁰ E paadip je xii je tiempo mina ca' nmíid'idañich ya naaxhuiñ yi' huídibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpijpyich, paady ca' ytügyí miid je jécyip ayuc huídibi je fariseo jäy ajcxy yaj'ixpijpy. Jadu'n nej miich ajcxy mnejhuíy co ni pín ca' agiyíy tuc huit miid tüg pedaaas jemy huit, con je' co je jemy huit nímujcp je', e chi nígi najtzcídzíhuip je tuc huit.

²² E nañ ni pín ca' jëb huaad pidägy jemy vino ma tuc cochac. Je' co je vino jemybi ycídzamy je tuc cochac, e chi y'ixyojctáhuip je vino etz je cochac ñitigoydáhuip. Hue' janchtiy jëb ajcxy pidacy jemy vino ma jemy cochac.

Je discípulos ajcxy yajmújcixy je moc cojc sábado xii

²³ Tüg sábado xii Jesús miid ydiscípulos ajcxy ñaxíy ma tüg trigo cam. E huin'ítíyí je ydiscípulos

ajcxy ytiḡiy je trigo tujcp. ²⁴ Co je fariseo jāy ajcxy ijxy jadu'n nej Jesús ydiscípulos ajcxy anajty tujcmujc trigo tūm, chi ajcxy nimay Jesús:

—Ix miich. ¿Na'amy co miich mdiscípulos túngixy huídibi judío ycötújcín capx'adujcpy sábado xii?

²⁵ Per Jesús yminañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tūgtecy jecy'ajty, co David etz ymīgūgtijc yuu'ōgaangixy anajty? ²⁶ Je huin'it tiempo jecy'ajty co je judío teedy Abiatar mijtungmīdipi anajty ma Dios ytijc, chi David ytiḡiy ma Dios ytijc, e caay je tzajcaagy huídibi ti anajty yoxy ma Dios yhuinduu. Dios ycötújcín yminañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jāy huídib anajty ajcxy ymīd.

²⁷ Nañ jadu'n Jesús yjacminañ:

—Iich, je jāy huídibi tzoon tzajpjoty, nmīdich ané'min, jaydēb nimāyich je jāy ajcxy ti jēb túngixy sábado xii. ²⁸ Com Dios ti ixmach je sábado xii, paady ycixpi, iich je jāy huídibi tzoon tzajpjoty, nmīdich ané'min jaydēb nimayich jāy ajcxy co jēb tijaty tuñ sábado xii.

3

Je yēydijc huídibi anajty yci' tīdzip

¹ Jesús ytiḡiy jadūg'oc ma je judío naymujctac. Jiiby anajty tūg yēydijc huídibi anajty ymīd tūg yci' tīt. ² Je fariseojāy jiiby ma je naymujctac y'ijx'ijtpy anajty Jesús, co anajty nejhuñhua'ñ pen Jesús yajtzögamy je pa'mjäy sábado xii, jigix jēbi ajcxy xihuip Jesús co ti ytundigoy mīd judío jāy

ycötújcín. ³ Jesús nımay je jäy huıdıbı mııd tüg yci' tıtz:

—Pıdıg, min ya ma ııch.

⁴ Huın'ıt Jesús y'amıdıy je jäy ajcxy e nımay:

—¿Nej mııch ajcxy mınaangıxy: Nej jėbi jada nduñıch je oybı o je jıbıcpı sábadı xıjoty? ¿Jėbi nyajtzögıch jäy o jėbi nyajtıgoyıch jugy'ájın?

Per je jäy amıñ ajcxy ıjty, ca' ajcxy je' y'adzooy.

⁵ Huın'ıt Jesús huındıxpejty je jäy ajcxy mııd chip y'ahua'n, e mııd jotmay, je' co ooy ajcxy jotjuuñıty, e chi nımay je yėydıjc:

—Xajtıy yı mgı'.

Chi je yėydıjc xajtıy yci', e chi yci' oy chögy. ⁶ Chi je farıseojäy ypıdzımday ma je naymujtac, ooy yjotmädy ajcxy, e ñıcxıy ajcxy ñaymújcp mııd je jadügpıcy judıo huındzındıjc huıdıbı ymıjnıcxpejt je rey Herodes. Huınma'ñ ıxtaayb anajty ajcxy nej jėb ocıaj'ögıp Jesús.

Mayjäy ma tüg nıba'

⁷ Per Jesús choon mııd yı' ydiscıpusos ajcxy, ñıcxıy ma mejypa'. E ooy mayjäy huıdıbı ajcxy tzomb Galılea ñaaxjot etz Judea ñaaxjot panıcxıy ajcxy Jesús. ⁸ Nañ jadu'n mayjäy panıcxıy ajcxy Jesús huıdıbı ajcxy tzomb jım Jerusalén, huıdıbı ajcxy tzomb jım Idumea ñaaxjot, huıdıbı ajcxy tzomb jım Jordán mıjnı nıınaxıy ma xıı ypıdzımyb, huıdıbı ajcxy tzomb jım Tıro etz Sidón ñaaxjot. Ñıcxıtäy je mayjäy ma Jesús yajpaady, com ñejhuııyb anajty ajcxy je mıjhuınma'ñ huıdıbı Jesús anajty ytumyb. ⁹ Com tzach mayjäy anajty ymııngıxy, paady Jesús nı'ane'mdıy ma yı ydiscıpusos ajcxy tüg barco ma jėb ıñäy, ca'ty je mayjäy ooy y'adıjıyıı

y'agodÿyii. ¹⁰ Com Jesús ti anajty yajtzögy may jäy, paady ycixpi tög'óciy je pa'mjäy nimujcy Jesús, adzip tzachnidonaangixy. ¹¹ Co je jäy ajcxy huídibi ca'oybi ymüd ijxpaty Jesús, chi ajcxy ñayhuijojtaci ma Jesús yhuinduu, e mic ycapx-cooty, yminaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tög cögop, e capxyñiguexy co huen miñ ma yi' je ymigügtijc huídibi yhuin'ixamy co ytunam müd yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huídibi ymüd'idamy, e huídibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxü nidüg nidüg: Simón, je huídibi Jesús yxü moy Pedro; Jacobo müd y'uch Juan, yi Zebedeo y'ung y'anäg, je huídibi ajcxy Jesús yxü moy Boanerges (je ayuc Boanerges jadu'n yhuimbídzimy: “Enee ymang”). ¹⁸ E jacjadyii huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadügpí Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agojüx cÿeyc Jesús ma ymidzip.

Yajnibjccixy Jesús co müdity mujcu' ymic'ajt

(Co jadu'n huin'ijxtaay je majcmetzpi discípulos ajcxy), Jesús ytiǵiiy ma tügtijc miiid yi' ajcxy. ²⁰ Huin'ítiiy tzach mayjäy ñayyöymújciǵixy ma je tijc ma Jesús y'ity, ixti Jesús etz ymiǵügtijc ca' y'oyïy nej jëb ycaayǵixy y'uuccixy. ²¹ Co Jesús y'amigügtijc jadu'n nejhuuïy, chi ajcxy nimiiñ Jesús yajnicxaangixy anajty mach, com hue' anajty tǵicixy co Jesús ylociib.

²² Nijëjity escribas ajcxy, je huindzindijc huidibi nijaydutp anajty Dios ñecy, miin ma Jesús co choñ ajcxy Jesusalén, ymïnaangixy:

—Jada Jesús ymiiid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ miiid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmiiidmiydacy ajcxy tüg jihuimbit ayuc. Chi Jesús ymïnañ:

—¿Nej tiy'ajt jada nej miich ajcxy mïna'ñ co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mïna'ñ. ²⁴ Pen tüǵpicy tungmiidpi ixyipy ñaybijc-huá'cxigixy, etz ñaymidziptzóonigixy ixyipy ac jëyi. Pues cixip yi' ajcxy y'ané'min. ²⁵ Nañ jadu'n pen tüǵpicy tüg juugy tüg miǵüg ixyipy ñaybijc-huá'cxigixy, ca' ajcxy y'idaangixy tügmucy. ²⁶ Nañ jadu'n pen Satanás ixyipy ti ñaybijc-huäcxyii, e ci'm ixyipy ti nayñibidigyii, ca' ixyipy yi' ymic'ajt ida'ñ. Hue' janchtiy Satanás cixipy tǵogoyipy. (Paady ca'tiy'ájtity nej miich ajcxy ymïnañ.) ²⁷ Ca' ni pin jëb huaad ytiǵihuïp ma tüg micpi jäy ytiǵc etz meedzipty tijaty ymiiid, pen ca' jayijp cixoch tecyxoch je jäy micpi.

Pen ti c̄ixoch tecyxoch ixyipy je mic̄jäy, huin'it janchtiy mimadägipy, e píjçip tijaty ym̄id.

²⁸ Janch ñich miich ajcxy nimäy co Dios jëb huinmeecxip tüg'óciy pocy huidibi jäy ytúngixp etz tüg'óciy jibicpi huidibi jäy ycapxp. ²⁹ Jëyi janchtiy co pinjaty capxtigooyb m̄id je Espíritu Santo, je Dios yjihui'ñ ymic'ajt, ca' Dios huinmecxi nimina. Huinixi y'ida'ñ pocym̄id.

³⁰ M̄id co jäy ajcxy chach ym̄inaangixy co Jesús anajty m̄idity ca'oybi, paady Jesús jadu'n ym̄inañ.

Jesús ytaj etz y'uch miguëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capxñiguejxy Jesús. ³² Je mayjäy huidibi anajty ajcxy iñaayb jühuiditi ma Jesús, ym̄inañ ajcxy:

—Miich ndaj etz m'uch cheeby ajcxy tiba'y mi-ich ixtaayb.

³³ Chi Jesús ym̄inañ:

—¿Pinjäy miich ajcxy ndijy co ñich ndaj'adyii etz ñich n'uch'adyii?

³⁴ Huin'it Jesús huindicxpejty je jäy ajcxy huidibi anajty iñaayb ajcxy jühuidity ma je', e ym̄inañ:

—Tüg'óciy jada jäy ya jadu'n ajcxy nipaady nej ñich ndaj etz ñich n'uch. ³⁵ Huenytimypinity huidibi ajcxy cuydumb yi Dios chójcin, yi' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

4

Je niipi y'ixpejt

¹ Jadüg'oc Jesús ytiḡiḡy yaj'ixpijcpḡ ma mejypa'. E ooy mayjäy ymujcpejty ma anajty Jesús yajpaady. Miid co ooy anajty chachmayjäyity, paady Jesús ytiḡiḡy ma tüḡ barco jahuengi mejyjoty. Jesús iñaayb anajty barcojoty, e je mayjäy iñaayb anajty ajcxy ma mejypa'. ² Huin'it Jesús yaj'ixpijcy je mayjäy miid canaag jihuimbit ayuc. Co yaj'ixpijcy, chi ymiñañ:

³ —Amidoo'ijtcix miich ajcxy ḡch jada n'ayuc. Tüḡ jäy chooñ niipi. ⁴ Co je niipi yhuijpy anajty trigo tḡm, chi je trigo tḡm nijējity ooycäy tim tüḡujc. Chi je joon ajcxy ymiñ jicxy je trigo tḡm huiḡibi tüḡujc ti ycäy. ⁵⁻⁶ E nijējity trigo tḡm oycäy ma tza-anicx, ma nihueeñ oyñaax yajpaady. E je trigo tḡm ca' tzip mujx je', je'co ca'anajty ooy naax mápxity. E co je xiḡ ypidzimy, chi no'cy je trigo mang, com ca' anajty ytictz miidity naaxjoty, chi ytḡch. ⁷ E nijējity trigo tḡm oycäy ma apyjot. Co jada trigo tḡm ymujxy, chi y'ujtz'ögtäy je trigo mang, e ca' ytḡm'ajty. ⁸ Per jacjadyii trigo tḡm oycäy ma oyñaax, chi ymujxy, e ytḡm'ajt may'amy: tüḡ pi'c pajc iipxmajc oyco'ity, jadüg pi'c pajc tugi'px oyco'ity, jadüg pi'c pajc miḡo'px oyco'ity.

⁹ Co Jesús je miydäḡiḡ yajmay, chi ymiñañ:

—Pinjaty miid ytätzac, pin midohuamy, huen mido'mbicy jada ayuc.

Ti yi' ñiḡapxyp yi ijxpejt

¹⁰ Co je mayjäy ḡicxni, e Jesús yhui'my naydüḡ, chi je nimajmetzpi ydiscípulos ajcxy etz jacjadyii huiḡib miñicxpejt Jesús ñimijhua'cy, e amidoy nej yhuimbidzimy je jihuimbit ayuc. ¹¹ E Jesús ymiñañ:

—Miich ajcxy jaydëb mnejhuïhuïpy huïdibi Dios ñigapxpy ñimiydacpy coyüch'amy ma y'ané'min ycötújcin. Jacjadyii jáy ajcxy jihuimbit'amy nyajmïdmïydaacyich. ¹² Jadu'n jihuimbit'amy nyaj'ixpijcpyich je mayjäy, jaydëb co pinjaty ijxp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiy nej yhuimbïdzïmy je niipi y'ijxpejt

¹³ Chi Jesús yjacmïnañ:

—¿Nej ca' miich ajcxy mhujnjïhuïy jada jihuimbit ayuc? Pen ca' miich ajcxy mhujnjïhuïy jada jihuimbit ayuc, ca' miich ajcxy mhujnjïhuïy yï jacjadyii jihuimbit ayuc. ¹⁴ Je huïdibi capxhuäcxp Dios y'ayuc, jadu'n yï nipaady nej je huïdibi niip trigo tïm. ¹⁵ Je jáy ajcxy huïdibi amidoo'ijtp Dios y'ayuc, e mic'amy je ca'oybi yajpïdzïmy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tïm huïdibi cáb tügujc, e je joon ajcxy mic'amy piimujctay. ¹⁶⁻¹⁷ Je jáy ajcxy huïdibi amidoo'ijtp Dios y'ayuc janch jotcujc, e mïbíjccïxy tzojccïx, chi ajcxy ixmajtzi Dios y'ayuc co agapxiyb paady, e co tzaachypi minaxy yajnaxy mïd Dios y'ayuc ycixpi. Jadu'n ajcxy nipaady nej je trigo tïm huïdibi ti ycäy ma tzaanïcx. ¹⁸⁻¹⁹ Je jáy ajcxy huïdibi amidoo'ijtp Dios y'ayuc, e co ñïcxni, chi jäydi gooyñi Dios y'ayuc mïd jotcujc'ájtïn tzïnaayïn, etz comeeñ'ájtïn etz adzójcin. Jadu'n ajcxy nipaady nej trigo tïm huïdibi ti ycäy ujtzyoty, e ca' ytiim'aty mïd co oy y'ujtz'ögy. ²⁰ Je jáy ajcxy huïdibi amidoo'ijtp etz

cöbijeçp Dios y'ayuc amumdügiot etz Dios y'ayuc tumb ma ajcxy yjot yhuinmañ, jadu'n ajcxy nipaady nej je trigo tım huıdibi ti cáb ma oyñaax etz ytım'aty may'amy: tüg pi'cpajc iipxmajc, etz jadüg pi'cpajc tugi'px, etz jadüg pi'cpajc miço'px.

Je lámpara ñi'ijxpejt

²¹ Chi Jesús yjacmınañ:

—Co jäy ajcxy jındıcxı'ñ nöctzoy, chi canan ajcxy cöjıjpy mııd tu'tz, ni ca' ajcxy pıdacy cıjxpa'tci'py, hue' janchtıy pıdaaccıxy ma jındıcxpejt jaydeb mij ytııcxy. ²² E nañ ni ca' ni pın ni ti jeb ameech tunıpy, e nicxy ycayajnejhuıy. E ca' ni pın ni ti ayüch tunıpy, e nicxy ycayajnejhuıy. ²³ Pınjaty ytätzac ymııd, pın mıdoohuamb, huen mıdo'mbıjccıxy ıch n'ayuc.

²⁴ Nañ jadu'n Jesús ymınañ:

—Cuendtúngıx jada ayuc huıdibi miıch ajcxy yam mmıdooyb. Yi quıpxı'ñ huıdibi ajcxy myajquıpxııyb, nañ jadu'n yi' mııd Dios ajcxy xyquıpxyhuımbıdıpy, e ıxtı jacyajmöhııp ajcxy huıdıjaty mıdoob ıch n'ayuc. ²⁵ Pınjaty ymııd, yajmöhııp nıgi, pınjaty hueen mııd, yajpıgıpy nıgi (oy ıxyıpy hueen jadım mııdıty).

Je tım huıdibi yeecp ñi'ijxpejt

²⁶ Nañ jadu'n Jesús ymınañ:

—Yi Dios y'ané'mın jadu'n yi' nej co tüg jäy nicxy ñıpy ma ycamjot. ²⁷ Chi jada' co ñııptay ñıcxni ma ytıjc e ymi'o'cni ymäybıdıgnı com jabom, e jadu'n yajnaxy canaag xı tzuu. E je moc pajc mujxp je' etz yomb. Per je cogam ni ca' nejhuıy nej je moc yoñ, ma mıc'ajt paady. ²⁸ Je' co yi naax ci'm mıc'ajt

müdüty jaydëb yajyoñ je moc. Jayijp ypidzimy je moc ung, jac'axam ypidzimy yi moc pijy, e chi jada' ytiim'ajtni. ²⁹ Co je moc ymajaaní, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús ymíñañ:

—¿Nej m'oc'a'ixíygyxy yi Dios y'ané'min? ¿Ti müd n'ocyajquipyxíhuibich? ³¹ Jadu'n Dios y'ané'min nipaady nej mostaza pajc huídibi tüg jäy nicxy niipy ma ycam. Yi mostaza pajc jacnigi ymúztity ca'ydi jacjadyii ujtzpajc huídibi yajpatp ya naax-huíñ. ³² E co yajniipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tüg'óciy yci' y'aacx, ixti joon ajcxy pe'mb ma je yci'y'aacx y'anicíy.

Nej anajty Jesús yecy je tiy'ajt müd je ijxpejt ycxipi

³³ Jadu'n anajty Jesús yaj'ixpicy je mayjäy ajcxy Dios ytiy'ajt müd canaag jihuimbit ayuc, ixti mibaad ajcxy jëb huinjihuíy. ³⁴ Ac jihuimbit ayuc Jesús yajnimay je mayjäy. Per müd yi'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbídzimy je ijxpejt

³⁵ Je huin'it xi co ycoodzíy, chi Jesús nimay yi ydiscípulos ajcxy:

—Tzoc ajt jámim jim'amy ahuin ma yi jadügpí mejypa'.

³⁶ Huin'it Jesús ydiscípulos ajcxy ixmajztay je mayjäy, e müd tzoñ Jesús barcojoty. Nañ jadu'n jacjadyii barco ajcxy choñ quipxy müd Jesús ydiscípulos ajcxy ybarco. ³⁷ Je huin'it coodz tüg poj miñ janch mic. E je mejy nigoo anajty y'ocpidigni.

Janch tigiyb anajty ni barcojoty, jagoo jagoo yca'ujtzatay je barco miid ni. ³⁸ Jesús maab anajty ma je barco iix ma tüg mabejt. Chi yajmäybiidigi, e nimay ajcxy:

—Huindzin, ¿nej ca'mduñcuend co ich ajt yam nguinaanim?

³⁹ Huin'it Jesús ymäybiidigy, e jipcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ymiñañ:

—¿Na'amy co mdzachtzigiiygixy ajcxy? ¿Nej ca' mmibíjccixy co nmíidich Dios ymic'ajt?

⁴¹ Jesús ydiscípulos ajcxy ooy chigiiy, e ñayñimaayi ajcxy miñ xyipy:

—¿Pin jäy jada' jada Jesús? Ooy chachmijhuinmañ co yi poj etz je mejy ycapxymidoyii.

5

Je Gadarajäy huídibi anajty ca'oybi miid

¹ Chi Jesús miid ydiscípulos ajcxy oyja'tcixy ma je mejypa' ma je Gadara jäy ñaaxjot. ² Tim mic'amy co Jesús ybarcobidzimy, chi nimiiñ tüg jäy huídibi ca'oybi miid anajty. Hue' anajty chooñ ma öcpi jut. ³ Je yëydijc, ca'oybimiidpi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cïxoch tecyxoch jada je ca'oybimiidpi, e ni ca' ajcxy mimadacy miid cadena. ⁴ Canaag'oc ajcxy jacïxojch jatecyxojch miid cadena, e ypojtayb anajty je cadena. Ni pin camihuinmañybaady nej jëb ocmimadaaccixy je

ca'oybimiidpi. ⁵ Je ca'oybimiidpi xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayyajtzaachiyii anajty miid tzaa.

⁶ Jiguëgy anajty je ca'oybimiidpi ymiiñ, co ijxpaty Jesús, chi poyigy ninicxy Jesús, e ycojxtinay'ahuiy ma Jesús yhuinduu. ⁷ Je ca'oybimiidpi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ñch jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ñch ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yi may idzim, jigix jëbi n'adigiych njottigiych yi may idzim.

¹³ Chi Jesús jadu'n a'ixiy co jëbi adigiyygixy jotigiyygixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjiydaay, e ycögänaxtaay ajcxy ma tüg tzajjip, e oy ycädaaygixy niijoty, e chi ajcxy ññögtay.

14 Je idzim cuend'ajtp ajcxy ooy ajcxy ñay'adzigiñyi, e nicxtay ajcxy poyigy ma ytijc. E oy nimiyaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. 15 Co je mayjäy ajcxy yja'ty ma Jesús yajpaady, chi ajcxy ijxy je yëydijc huídibi anajty mayca'oybi ymiid. Ijxy ajcxy co ñäy huit miid etz huijyujc, ti anajty y'oyiy. E huin'it ooy ajcxy je mayjäy ñay'adzigiñyi. 16 Je jäy ajcxy huídibi anajty huindicxp co anajty je ca'oybimiidpi ti y'oyiy, etz ijxcixy nej ti ytunyii ti yjadyii miid je may idzim, chi yajmiydactay je maycajpyäy jadu'n nej anajty ti ijxcixy. 17 Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

18 Co Jesús ytigñy jadüg'oc ma je barco, chi je yëydijc huídibi anajty ca'oybi ti ñibiðzimyii ti ycöbiðzimyii, pijctzoy may'ajt ma Jesús co huen a'ixiy möhuip co huen miid'idyii Jesús. 19 Per Jesús ca' a'ixiy co ymiid'idyii, chi nimay:

—Huimbit ma mdijc etz mjugymigüg, e yajmiidmiydäg jada mijpi tung mijpi huinmañ huídibi je Huindzin Dios ti tuñ miid miich. Miidmiydägipy jadu'n nej je Huindzin Dios ti xypa'ayoy.

20 Chi je yëydijc yhuimbijtni, e huídijtp anajty cajp cajp jim Decápolis ñaaxjot, e nimiydactay tüg'ócay jadu'n nej Jesús ti yajtzögyii, e tüg'ócay je mayjäy ooy jihuüy huinmay.

Je Jairo ñix etz je töxyjäy huídibi Jesús yhuít ñidoni

21 Co Jesús huimbijty barcojoty ma je mejypa' ma anajty ti chooñ, chi mayjäy ymiñ ma Jesús

yajpaady, chi Jesús yhuäcxijpy ma je mejypa'.
²² Huin'it Jesús ñija'ti tüg mïjtungmïdipi ma yi judíojäy ajcxy ñaymujctac. Je yëdyjc hue' anajty xijity Jairo. Co Jairo ijxpaty Jesús, chi ñayhuijojtac ma Jesús yhuinduu. ²³ Jairo may'ajt pijctzoy, yminañ:

—Huindzin, ögaanip ïch nnïx. Tun may'ajt nicxy ma ïch ndijc, e mgïñixájip ma ïch nnïx, jigix jëbi myajtzögip, e yjactzinähuip.

²⁴ E Jesús nicxp anajty mïd Jairo, e mayjäy panicxy anajty Jesús. E je mayjäy ooy anajty tzach'adij'y tzach'agodi'y Jesús. ²⁵ E ma je mayjäy ymiñ anajty tüg töxyjäy pa'm mïd, jécyiñ anajty ymïjtacni. Majmetz jimïjt yxi ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ mïd may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigí anajty ypa'm mïjhuañ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiñ etz nimïjhuägy jïxcí'py'amy, chi nïdooni Jesús yhuitpa'. ²⁸ Jada töxyjäy nayñimaayi jotjoty huinmañjoty: “Co nnïdónibich Jesús yhuitpa', mïd tim yi'yi ndzögibich.” ²⁹ Co je töxyjäy nïdoñ Jesús yhuitpa', tim huin'ítiy mic'amy yhuäcxijp je ni'py. Huin'it je töxyjäy jïhuïy co anajty ti chögy.

³⁰ E Jesús jïhuïy co anajty ti yajtzögy tüg jäy mïd ymic'ajt, paady ni'ijxhuimbijty je mayjäy huïdibi anajty pamíinip, y'amïdooy ajcxy:

—¿Pin ïch nhuit ti xyñïdoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yi mayjäy xychach'adijïy xychach'agodïy, e miich mïna'ñ: “¿Pïn ti xyñidóñich?”

³² Per Jesús huindïcxypejty je mayjäy jühuidity ma yi', oc'ixa'ñ ocnejhuïhua'ñ pïn anajty ti ñïdonyii.

³³ Huin'it je töxyjäy, com ñejhuïyb anajty jadu'n nej Jesús ti yajtzögyii, paady nimïjhua'cy Jesús janch tziyuuyb mïid tzigï'ñ ñayhuijojtaci ma yi' yhuindu. ³⁴ Jesús ymïnañ:

—Töxyjäy huïdibi ooy ndzócyich, ti mdzögy mïid co ti xymïbïcyich. Nicx agujc jotcujc, ti mba'm ñaxy.

³⁵ Capxp mïydacp anajty Jesús mïid je töxyjäy co nijëjty jäy ñimiini, choñ ma je judío jäy ñaymujctac mïjtungmïidpi ytïjc, e nimay je töxy'anäg yteedy:

—Yi mnïix ti je y'ögy. Ca' huaad mjac'amayïy nïg yi Huindzin Jesús.

³⁶ Per Jesús ca' tuñcuend jadu'n nej ajcxy yjamïna'ñ, chi nimay je naymujctac huindzin:

—Ca' mdzigïy, mïbic nïgoda'ajty.

³⁷ E ni ca' jac'a'ixiy nicxy yjacmïdnicxyii jacpïnjaty. Jëda'ajty mïdnicxy je Pedro, Jacobo etz Juan, je Jacobo y'uch. ³⁸ E co Jesús ytïjctigïy ma yi naymujctac huindzin ytïjc, chi ijxy jadu'n nej jäy jïiby chachne'mgïxy chachjïygyxy chachyaaxcïxy.

³⁹ Co Jesús tijctigïy, chi nimay je jäy ajcxy:

—¿Nej co nïgoo ajcxy mdzachne'mni, e mdzachyáaxcïxni? Yi pi'c töxy'anäg ca' yi' ti y'ögy, maab yi'.

⁴⁰ Per nïgoob ajcxy Jesús nixiicy co jadu'n ymïna'ñ. Huin'it Jesús yajpïdzïmday tüg'óciy pïnjaty anajty jïiby tigoty, e mïid tijc tigïy jëda'ajty je ungedeedy etz ungdaj, e nañ je tugïgpi ydiscïpulos huïdibi anajty ti mïid mïiñ. Chi ajcxy ytïgïy jïiby ma

anajty je töxy'anäg yajpaady. ⁴¹ Chi Jesús májtziy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbǐdzimay: Töxy'anäg, ñch miich yam nimaayb, pǐdǐg.

⁴² Huin'ítiiy je töxy'anäg, je huídibǐ anajty majmetz yjimijt, ypǐdǐgy e ytüyöychoñ. E tüg'óciy yi mayjäy ooy ajcxy jihuüy huinmay. ⁴³ Huin'it Jesús najtzcapxiy co ca' huaad pǐn yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús chooñ ma je jimbi it lugar, e yhuimbijty ma yci'mgajp. E miid ñicxy yi' ydiscípulos ajcxy. ² Sábado xiijoty Jesús ytigiy yaj'ixpǐjcp ma je mayjäy huídibǐ yöymújccixp ma je judío jäy ñaymujctac. E je mayjäy huídibǐ amidoo'ijtp anajty ooy jihuüy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpǐgǐy jadayaab ixpǐjcin? ¿Ma ti paady jada huijy'ajt cujc'ajt huídibǐ ymiid? ¿Ma jada' ti paady yi mic'ajt huídibǐ miid mijhuima'ñ tumyb? ³ Je' jada je tzejtzpi, yi María y'ung. Yi' y'uch ymigüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quipxy miid ñch ajt.

E je mayjäy ca'ajcxy anajty ixa'ñ cöbiga'ñ Jesús. ⁴ Huin'it Jesús nimay je mayjäy ajcxy:

—Huenma'ámyity tüg'óciy je mayjäy ooy yajmij'aty je jäy ajcxy huídibǐ najtzcapxiyb Dios

y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ yti'm jadu'n yi' y'amigügtijc etz ymijjin ymidijc.

⁵ Ma yci'm naax yci'm gajp Jesús ca' jaty nej mijhuinmañ tunipy miid co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy.

⁶ Jesús ooy jihuüy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jëyi jëb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeen. ⁹ Jëyi je yci'g etz je yhuit huidibi anajty ajcxy ymiid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhuimipy ixti coon mdzoonip ma yijimbi cajp. ¹¹ Pen mdigiygixp ma tüg cajp, e je jäy ajcxy ca' ajcxy xycöbigañ, ca' ajcxy amido'idañ miich m'ayuc, mbidzimgix ma je cajp, chi mhuinhuópcixipy mgig. Jada je' je tiy'ajt co ca' ajcxy mjotcújcity. Janch ñch miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paadañ yi' jäy ajcxy huidibi ajcxy anajty

ca' xycöbïjccixy, ca'ydi je' ajcxy huïdibi tzinaay jecy'aty ma Sodoma etz Gomorra cajp.

12 Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbïjtcixy, huen ixmajtztaaygixy yi pocytunï. 13 Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

14 Huin'it je rey Herodes nejhuïy co Jesús canaag mijhuinma'ñ tzachytuñ anajty, com tüg'ócïy je mayjäy anajty nimïydaaccixy Jesús. Herodes ymïnañ co Juan je Bautista ti yjugypicy jadüg'oc ma anajty ti y'ögy, paady mic'ajt mïdity jaydëb mijhuinma'ñ tuñ. 15 Nijëjty jäy ymïnaangixy:

—Jesús yi' je' Elías.

E naagïty jäy ymïnángixy:

—Yi' je' tüg Dios tiy'ajtmïdpi huïdibi quipxyïby mïd je Dios ytiy'ajtmïdpi huïdibi tzinay jecy'ajty.

16 Co Herodes nejhuïy nej je mayjäy nimïydaaccixy Jesús, chi ymïnañ:

—Janch jada co Juan ti yjugypicy, je huïdibi nni'ane'mdïyich co huen yajmïnagyyi ycohuajc.

17 Mïd Herodías, Herodes ytöxytïc ycïxpi, Herodes n'ane'mdïy co Juan yajmach, e pidägyii pujxtïgoty. Jada Herodías jayïjp ypïjcy mïd je rey Herodes y'ajch Felipe, per ti anajty ixmach Felipe, e ypïjctïgajch mïd je ycapy Herodes. 18 Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytïc miich mïddzinaayi.

19 Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; 20 com je rey Herodes ñejhuñybyb co tudägy jäy huädz jäy anajty je Juan, e tzigñybyb anajty müid Juan. Paady ycixpi anajty je rey Herodes Juan müidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbidzimy, per jotcuyc anajty amido'ijty.

21 Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiñyñy. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'ócay yi mic jäydijc huñdibi ajcxy tzinaayb naag naag cajp jim Galilea. 22 Xiñduñyoty anajty co Herodías ñixx oy y'ech ma je rey anajty yajpaady müid je may jäy huñdibi anajty yajcaayb yaj'uucy. E jadu'n nej je Herodías ñixx y'eich, ooy je rey jadu'n jäygidacy, etz tüg'ócay je jäy je huñdijaty anajty müid ajcxy ycaaygixy y'uuccixy. Chi je rey nimay je töxy'anäg:

—Pijctzóhuigich ti mdimdzojcpy, ñich miich nmöhuipy.

23 Je rey ñigi capxcödujcy janch cixyjot huñijot co möhua'ñ ti ytimy ypijctzooyb, ixti jëb jamöy cujuhäcxy yi' y'ané'min, mibaad anajty ane'my je naaxjot. 24 Chi je töxy'anäg ñicxy ma ytaj oy amidoy, nimay:

—¿Ti nbijctzohuipich?

Chi je' ytaj y'adzooy:

—Pijctzoohuñ yi Juan je Bautista ycohuajc.

25 Míc'amy je Herodías ñiix nihuimbity je rey e yminañ:

—Ndzojycypich co xymöhuibich mic'amy je Juan je Bautista ycohuajc ma tüg texy.

26 Co jadu'n midoy je rey, chi ytiñiy tajp mayb janch mijcajee. Per ti y'octuniy. Com ti anajty jadu'n capxcöduy, ti anajty mayjäy midoy ti anajty ti yaj'ahuanüy je töxy'anäg, ca' y'ayuc yajxiicy.

27 Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. 28 Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcidiñiy je töxy'anäg, e je töxy'anäg yajcidiñiy ytaj.

29 Co je jäy ajcxy huídibi anajty mijnicxpejtp Juan ñejhuiy ajcxy co je rey ti yaj'ögy Juan, chi ajcxy y'oy e yajpidici Juan ñinicx, e yajnaaxtiñiy ajcxy.

Jesús yajcaay migoox mil yëydijc

30 Co je majmetzpi apóstoles ajcxy yhuimbijty huídibi anajty Jesús ti quexy y'ayuccapxhuäcxpi ma canaag cajp, chi ajcxy yajmidmíydacy Jesús tüg'óciy tijaty anajty ti túngixy, etz tüg'óciy ayuc huídijaty ti yaj'ixpijccixy. 31 Huin'it Jesús nimay je nimajmetzpi huídibi anajty ti quexy y'ayuccapxhuäcxpi:

—Tzoc jámim ma tüg it ma ca' pin, jaydëb nbócxim tüg xií metz xií.

Paady ycixpi Jesús jadu'n yminañ, com tzach mayjäy ja'ttiñb tzondiñb ma Jesús yajpaady, e ca' ajcxy tiempo anajty midity mina ycaaygixipy y'úuccixipy mid je mayjäy ycixpi. 32 E Jesús mid ydiscípulos ajcxy ñicxy barcojoty ma ca' pin. Ac

jëyi ajcxy nicxy ca' jac pin jäy mïid nicxy. ³³ E mayjäy ijxy co Jesús ajcxy choñ, e nañ ijxajpy pin anajty tzoñ barcojoty. Paady mayjäy chooñ ma canaag cajp tegyi'm, ñíxcixy poyïgy anajty ma Jesús ñíxa'ñ. Mayjäy oy yja'ty jayïjp ca'ydi Jesús ajcxy, e jim ajcxy yöymujctay. ³⁴ Co Jesús ybarcopidzimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huídibi ca' mïidity ycuend'ajtpi. Chi Jesús ytigiy yaj'ixpijcp, canaag nax ixpíjcin anajty yecy. ³⁵⁻³⁶ Co anajty ti chu'ïyñi, chi Jesús ydiscipulos ajcxy ñímaayi:

—Ca' ni pin chinäy ma jada yaabi it lugar, e ti chu'ïyñi. Capxycix mïid jada mayjäy ajcxy, jaydeb ñíxcixyñi ma yi cajp huinduy agonbi, huen nicxy júygiixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad ñich ajcxy nicxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscipulos ajcxy:

—¿Naag tzajcaagy miich ajcxy mïidity ya? Nicx íjxcix.

Co ajcxy tiy'ajt paty, chi ajcxy Jesús nimay:

—Ñich ajcxy nmïid migoox tzajcaagy etz metz acx.

³⁹ Chi Jesús ni'ane'mdïy co je mayjäy huen ix-taaccixy naaxcixy tügpicyjaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguïpxmajcjatypi.

41 Chi Jesús conĩgy je mĩgooxpi tzajcaagy etz je metzpi acx, e ypa't'ijxy tzajpcíxy, e yajnaxxy Dios cojuyip ma Dios mĩid je tzajcaagy etz je acx ycixpi. Huin'it Jesús tujc-huäcxy je mĩgooxpi tzajcaagy, e yajcĩdigiy je' ydiscípulos ajcxy, jaydëb ajcxy ya-jhuäcxip ma je mayjäy. Nañ jadu'n Jesús yajcĩdigiiy je metzpi acx je' ydiscípulos ajcxy, jaydëb ya-jhuäcxip ma je mayjäy. 42 Nidüg'óciy je mayjäy ajcxy ycaay y'uucy cüxyi. 43 Co je mayjäy ycaayday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. 44 Mĩgoox mil anajty ajcxy je yëydiçtjic huĩdibi cay uuc.

Jesús yöy nãhuingíxy

45 Huin'it Jesús ane'my je' ydiscípulos ajcxy co huen barcotigiiygixy mic'amy. Huen nicxícixy jayijp jim Betsaida jim mejy ñĩnajxy. Co yi discípulos ajcxy ybarcotigiyday, chi Jesús ycapxycíjxy mĩid je mayjäy. 46 Co anajty Jesús ti ycapxycíxy mĩid je mayjäy, chi ñicxy ma tũg cõgop Dios mĩbijctzoob. 47 Co ycoodziyñi je discípulos ajcxy anajty yajpaady mejyjoty ma je barco. Jesús naydũg anajty yajpaady mejypa'. 48 Jesús y'ijx co je'ydiscípulos ajcxy anajty ti y'anucxiiygixy mĩid mejycabi, je' co je barco anajty chachijpcobojiy. E co oy moñiy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. 49 Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nĩgo y'ijxmañiiygixy. 50 Com tũg'óciy yi discípulos ajcxy anajty ti ijxcixy

Jesús, e ooy ajcxy chigiiy, paady mic'amy Jesús migapxy je' ydiscípulos ajcxy, e nimay:

—Jotmic naybidáacigixy, ca' mdzigiiygixy. Ich yi'.

⁵¹ Huin'it Jesús ybarcotigiiy, e mic'amy je poj yxeemy, e je discípulos ajcxy ooy jihuüy huinmay.

⁵² Ooy ajcxy jihuiygixy huinmaaygixy, com ca' ajcxy huinjihuüygixy anajty nej Jesús je mayjäy yajcay müid je migooxpí tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'.

⁵⁴ Co ajcxy ybarcopidzimy, chi mic'amy je mayjäy ajcxy jim ijxcajpy Jesús. ⁵⁵ Poyigy je jäy ajcxy chooñ, e yajyöyñajxtay je cajp ajcxy huinduy agonbi, capxhuäcxixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba', e cohuaniiygixy Jesús co huen nidoñyii yi yhuitpa', e tüg'óciy huídijaty anajty ajcxy nüdomb, najxp ajcxy anajty je' ypa'm.

7

Huüdi jäy yaj'ahuimbijt pocyjayity

¹ Huin'it ymiiñ ma Jesús nijëjity fariseojäy ajcxy, je huindzindijc huídibi tzachpadumb judío ycostumbre. Nañ jadu'n müid müiñ nijëjity escribas, je huindzindijc huídibi ajcxy nijaydutp anajty Dios

ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytigiiy caaybi uucpi jaygĩbuju, ca' anajty cuydúngxixy judíojáy ycostumbre. ³ (Com yi fariseojáy etz jacjadyii judíojáy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytigiiygixy caaybi uucpi. Com yi judíojáy ajcxy co ajcxy ñicxy mayjáyoty etz yhuimbíjtcixy jadüg'oc ma ytijc, ca' ajcxy ycaixti cooni jayijp ajcxy ycibújcixy canaag'oc. ⁴ Yi judíojáy ymiid canaagnax costumbre huídibi cuydúngxixyp jadu'n nej ajcxy yajhuaatzcixy ajcxy ytaasi ytexy ytütz etz ypujx-texy.) ⁵ Chi je fariseos etz escribas ajcxy y'amídooy Jesús, nimaayi:

—¿Na'amy co miich mdiscípulos ajcxy ca' cuydúngxixy judíojáy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmíidpi Isaías jayhu'i'my jecy'ajty miid miich ajcxy ycixpi. Miich ajcxy huídibi naybidaacip jadu'n nej jihuüy ajcxy tudägyjäy, e ca' yjáncíty. Com jadu'n Isaías jaybejty co Dios jadu'n ymínañ:

Jada jäy jadu'n ajcxy ycapxcixy ymiydaaccixy jadu'n nej jihuüy xyajmij'atyich. Per ca' ajcxy xyajmij'atyich cixyot huiniot.

⁷ Naadigĩ co ajcxy xyhuin'ígixich xyhuinyáaxcixich. Ñayyaj'ixpíjcigixy ayuc tiy'ajt huídibi jäy ajcxy ti cojy ti macxy.

⁸ Chi Jesús ymínañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huídibi jáy ci'm ti cojy ti macxy. ⁹ Miich ajcxy ca' mgüendtúngixy Dios ycötújcín Dios ytiy'ajt jigix jëbi cuydúngixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pinjaty jibic nigapx ni'ojiiyb ytaj yteedy, copícy y'ögip.” ¹¹ E miich ajcxy mīnañ co tūg jāy nimāhuip ytaj yteedy co ca' pubeda'ñ ajcxy jadu'n nej padyii, mīid co tūg'ócīy tijaty yi' ymīid huídibi ytaj yteedy jē'adánip, hue' ti ahuanīy nigoo ma Dios. ¹² E pen jadu'n mīnañ, chi miich ajcxy mīnaangixy co ca' copícyity mbubéjtcixipy mdaj mdeedy. ¹³ Miich ajcxy midundigooyb Dios ycötújcín mīid mgostumbre huídibi myajnajxyp myajtigīiyb, etz jacjadyii jibic-huinma'ñ myaj'ixpíjccixy.

¹⁴ Jadūg'oc Jesús mījhuoy yi mayjāy ajcxy, e chi nimay:

—Mido'mbījccix miich ajcxy iich n'ayuc, e mhujnjihuīhuip ajcxy. ¹⁵ Ca' yi' yajpocycāhuīiyb huídibi jāy ajcxy ypidacy ma yhuin y'ahuac. Yi' janchtiy huídibi pidzim ma jāy ajcxy yjot yhuinma'ñ, yi' yi' yajpocycāhuīb. ¹⁶ Miich ajcxy mmīid mdātzac, mido'mbījccix iich n'ayuc.

¹⁷ Co Jesús ixmajch je mayjāy, e ytijctigīiy, chi je discípulos ajcxy yaj'amidoohuī nej yhuimbīdzīmy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhujnjihuīy jada ayuc? ¿Nej ca' mhujnjihuīygyxxy co huídibi tigīiy ma yi jāy y'ahuac (yi caayīn uucīn), ca' yi' yajpocycāy yi jāy? ¹⁹ Yi' caayīn uucīn hue'

yí jáy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymina'ñ, chi nejhuuyim co Dios ca' capx'aducy ni ti caayin ni ti uucin. ²⁰ E Jesús yjacminañ:

—Dios yajpocycähup jáy ajcxy mïid huïdibi pidzimb ma ajcxy yhuinma'ñ. ²¹⁻²² Ma yí jáy ajcxy yhuinma'ñ jiiiby chooñ jibic-huinma'ñ; jiiiby chooñ migapxtigoyi töxyjäy yhuinma'ñ; jiiiby chooñ je tundigooyi yëdyjc mïid töxyjäy etz töxyjäy mïid yëdyjc huinma'ñ; jiiiby chooñ jáyyaj'ögi huinma'ñ; jiiiby chooñ meedzi huinma'ñ; jiiiby chooñ mügi huïdidi huinma'ñ; jiiiby chooñ jibic-huinma'ñ; jiiiby chooñ je huin'in huinma'ñ; jiiiby choñ nayca'oy'ixi huinma'ñ; jiiiby chooñ je piitzcapxi huinma'ñ; jiiiby chooñ je amij agix huinma'ñ; jiiiby chooñ je tzuu huinma'ñ je loci huinma'ñ. ²³ Yi jadu'mbi jibicpi jiiiby chooñ ma jáy ajcxy yjot yhuinma'ñ, paady jibicpi jáy ajcxy túngixy, e ypocycäy ajcxy ma Dios.

Tüg töxyjäy huïdi ca' yjudiojäyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jáy ytijc, e ca' anajty tzocy co je mayjäy ñejhuïhuïyb ma y'ity. Per ca' jajty nicx yhuingoyüch. ²⁵ Mic'amy tüg töxyjäy nejhuïy ma Jesús anajty yajpaady. Hue' je töxyjäy ypi'cnix ymïid anajty ca'oybi. Je töxyjäy ymiñ ma Jesús, e ycojxtinay'ahuy ma yí yhuinduu. ²⁶ Je töxyjäy hue' anajty ycogájpity Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je töxyjäy nimay:

—Ooy ycopícyity co nbubedipyich jayijp Dios yjáy (yí judíoájáy). Jadu'n nipaady nej tüg ungedeedy. Tim copícy co je ungedeedy yajcayipy jayijp yci'm ung, e ca' möhuip uc je huídibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmínañ, per nañ jadu'n yí uc ajcxy yjicxyp je caagy abu'x huídi cáb naaxcíxy ma mesípa't ma je jäy y'ung ajcxy ycaay.

²⁹ Chi Jesús je töxyjäy nímáy:

—Tiy'ajt jadu'n nej ích miich tí xy'adzooy, paady ycíxpi jéb mhumbidipy ma mdíjc jotcuyc, je ca'oybí tí ypidzimy ma mníx yjot yhuinma'ñ.

³⁰ Co je töxyjäy huimbijty ma ytíjc, chi paty ypi'cníx cíx'am, tí anajty je ca'oybí ñíbidzimyíi ycöbidzimyíi.

Jesús yajtzögy tüg jäy huídibi cönat etz ahui'mb

³¹ Chi Jesús jím tzojci chooni Tiro ñaaxjot. Chi chooñ jím ñíxcy anajty Galilea, e níxcy ma je tü'aa huídibi najxp Sidón etz je cajp huídibi yajpatp jím Decápolis ñaaxjot, chi yja'ty ma Galilea mij laguunba'. ³² Jím ajcxy míd miiñ tüg jäy huídibi cönátíp etz aahui'mb. Chi ajcxy may'ajt pijtzooy ma Jesús huen cíníxajy je pa'mjäy. ³³ Chi Jesús mídnicxy je pa'mjäy ahuingujc ma ca' mayjäy, e pídacý ycíhua'x ma je pa'mjäy ytätzac. Chi chujy, e huin'it nídóni je ytoodz. ³⁴ Chi Jesús ypa't'íjxy tzejpcíx, e ymicxejy, e chi ymínañ Aramaico'amy:

—Efata —jada ayuc hue' yhuimbídzimy: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungíy etz ycapxni yajxon. ³⁶ Chi Jesús

ane'my je pa'mjäy etz ymígügtijc co ca' huaad ni pín yajmíidmiydägípy jadu'n nej anajty tí chögy. Co Jesús jadu'n mictägy ane'my co ca' huaad ni pín yajmíidmiydägípy je mijhuinma'ñ huidibi ytumyb, chi nīgi je pa'mjäy etz ymígügtijc míidmiydaaccixy hueñypínity. ³⁷ Je mayjäy ooy tzachjihuiy huinmay ajcxy, ñayñímaayí ajcxy miñ xyípy:

—Jada Jesús ooy oy chachtuñ. Ymímadactaayb yí'huenytimytíjity, ixtí yajmíidohuícpy yí' yí cónatpi etz yajcapxígy yí uumbí.

8

Jesús yajcay midax mil yëydijc

¹ Je huin'it xíi je huin'it tiempo mayjäy anajty tí ñaymújicigixy ma Jesús yajpaady, e ca' anajty je mayjäy ajcxy míidity tí ycaaygixípy y'úuccixípy. Jesús capxyñiguejxy je' ydiscípulos ajcxy, co huen miingixy ma yí' yajpaady. Co ajcxy ymíiñ, chi nímáy:

² —Ooy nba'ayooyích yí mayjäy. Yí' co cham midugíig xíi maabí ya míid y'ityích je mayjäy, e ni ca' ajcxy míidity tí ycaayípy. ³ Co ixípy nguex-huimbityích ajcxy ma ytíjic ayuu, ca' yjécyity yajpa'mgójípy ajcxy tü'am, com nijéjity ajcxy jíguëgy tí choongixy.

⁴ Chi je discípulos ajcxy Jesús adzooy:

—¿Ma ích ajt nbaatim je caayin uucin huidibi jëb míid nyajcaayim nyaj'úucim jada mayjäy? Com míjtigíduum ya nyajpaatim ma ca' pín chinäy.

⁵ Chi Jesús y'amídooy je' ydiscípulos ajcxy:

—¿Naag tzajcaagy míich ajcxy míidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuñygyxy naaxcíxy. Huin'it Jesús congy je huixtujcp tzajcaagy, e yajnaxxy Dioscojuyip ma Dios miid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymiid anajty nijéjity pi'c acx. Chi Jesús yajnaxxy Dioscojuyip ma Dios miid je pi'c acx ycixpi, e moy je' ydiscípulos ajcxy huen yajhuäcxtaygyxy ma je mayjäy. ⁸ Chi je mayjäy nidüg'óciy ycaay cüxyi, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jicxtuc tibi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycijxy miid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigy miid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzoob mijhuinma'ñybi

¹¹ Nijéjity fariseos ajcxy, je huindzindijc huidibi padumb judío ycostumbre, ymiñ ajcxy ma Jesús yajpaady, e ytigy ajcxy ijxquípxcixy y'ixpijcin miid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n oc-tunaangixy miid Jesús. ¹² Chi Jesús tajy may ñayjihuiyijoty jotjoty huinma'ñyoty, chi ymicxejy, e ymiñ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tza-

ppjoty? Janch ñich miich nimaaygixy co ca' nyaj'ixaangixy ijxpejt huídibi tzomb tzajpjoty.

¹³ E Jesús ytimycapxycixy mïid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy mïid ydiscípulos ajcxy ma mij laguun ñinaxy.

Fariseojäy ajcxy yaj'ixp'ijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymïañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huídibi ca' y'óyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimáayigixy ajcxy miñ xyipy:

—Je' co ca' ñich ajt nmimiinim caayin uucin.

¹⁷ E Jesús ñejhuuyb anajty nej je' ydiscípulos ajcxy ñayñimaayi miñ xyipy, paady ymïañ:

—¿Na'amy co mdzachnimiydaaccixy je caayin uucin huídibi ti mjäydigooygixy? ¿Nej ca' mhujnhuuygixy e ca' mguenditungixy ñich n'ayuc? ¿Nej co ajcxy mdzachcöjuuñity? ¹⁸ Miich ajcxy mïid mhuiin: ¿Nej co ca' m'ijxcixy huídibi ndumybich? Miich ajcxy mïid mdäzac: ¿Nej co ca' mmido'mbïjccixy ñich n'ayuc? ¿Nej co ca' mjäyméjtzcixy ti ti nduñich? ¹⁹ Jayhuin co ndujc-huäcxyich je migooxpï tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidigy?

Chi ajcxy y'adzooy:

—Hue' ñich ajcxy nyajpidĩgyich majmetz cach cayduc jicxtuc.

²⁰ Chi Jesús ymĩnañ:

—E jayhuin co ndujc-huäcxyich je huixtujcpi tzajcaagy, e nyajcaayich mĩdaax mil jāy: ¿Naag cach cayduc ti ajcxy myajpidĩgy?

Chi ajcxy y'adzooy:

—Hue' ñich ajcxy nyajpidĩgyich huixtujc cach cayduc jicxtuc.

²¹ Chi Jesús ymĩnañ:

—¿Nej chambaad miich ajcxy ca' mhuiñjihuñy?

Jesús yajtzögy tũg jāy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijējity jāy mĩd mĩñ ma Jesús tũg huintzpi, e pijetzoy ajcxy may'ajt co huen nĩdoñ jigix je huintzpi y'ijxĩgipy. ²³ Huin'it Jesús huijtz-zooñ je huintzpi ma yci', chi mĩd cajppĩdzĩmy. E chi Jesús yajjaaxy yĩ chujyñĩ je huintzpi yhuin, etz cĩñxajy, e chi amĩdoy pen y'ijxpy anajty tigati yinjaty huenjaty. ²⁴ Chi je huintzpi huindĩcxpejty Jesús, e nimay:

—N'ijxypich yēyđictijc, e jadu'n ajcxy yquēxĩgy nej quipy, per yōyp ajcxy.

²⁵ E jadũg'oc Jesús yci' pĩdacy ma je huintzpi yhuin, e chi je huintzpi yhuindĩcxpejtpy anajty, e chi yhuin y'oyñy yajxon, huin'it oy huädz y'ijxy.

²⁶ E Jesús ycapxycĩjxy mĩd je', e quejxhuimbijty ma ytijc. Chi ymĩnañ:

—Ca' mdĩgĩhuip cajpjoty, e ni pĩn jada mgayajmĩdmĩydĩgipy.

Pedro capxypĩdzĩmy co Jesús yĩ'je'je Cristo

27 Chi Jesús ñicxy m̄id ydiscípulos ajcxy j̄im ma nijj̄ity mutz cajp m̄ihuingon je m̄ij cajp Cesarea Filipino. E tü'am Jesús am̄idooy ajcxy ydiscípulos, ñimay:

—¿Nej jāy ym̄inaangixy p̄in ñich?

28 Chi ajcxy je' ydiscípulos y'adzooy:

—Nijj̄ity jāy ym̄inaangixy co miich je' je Juan, je Bautista. E nijj̄ity ym̄inaangixy co miich je' je Elías. E jacjadyii ym̄inaangixy co miich je' t̄üg Dios y'ayucnajtzcapx̄iyb̄i hūidib̄i t̄üḡiyb̄ m̄id nijj̄ity Dios yt̄iy'ajtm̄idp̄i hūidib̄i tz̄inaay jecy'ajty.

29 Jesús y'am̄idooy je' ydiscípulos ajcxy:

—Miich ajcxy, ¿nej miich mm̄inaangixy p̄in ñich?

Chi Pedro y'adzooy:

—Miich je' je Cristo.

30 Chi Jesús ñimay je' ydiscípulos ajcxy co ca' huaad ni p̄in ñimaaygixy, co ȳi' je' je Cristo.

Jesús capxyp̄idz̄imy co y'öga'ñ

31 Chi Jesús jacyaj'ixp̄icy je' ydiscípulos ajcxy, e ym̄inañ:

—Cop̄icy co ñich, je jāy hūidi tzoön tzajpjoty, nya-jnaxipyich m̄ij tzaachpȳi etz m̄ij ayo'n. Ȳi m̄ijj̄aydj̄ic ajcxy, ȳi judío teedy m̄ijtungm̄idp̄i, etz ȳi escribas, je hūindz̄indijc hūidib̄i ñijayduut̄cixyp Dios necy, ca' ajcxy xy'ixa'ñich, e xyaj'öga'ñ ajcxy, e coduḡiig x̄i njugyp̄iḡipyich jad̄üg'oc co ñich anajty t̄i n'ögy.

32 Co Jesús jadu'n nigapxy ñim̄iydacy hūadz hūadz nej yjada'ñyii anajty, chi Pedro huob̄ibz̄imy Jesús ahuingujc, chi ooy ojy. 33 Chi Jesús ñi'ijxhuimbijty ydiscípulos ajcxy, e ojy je Pedro, ñimay:

—Huinhuäctuutcih, miich Satanás. Com miich ca' mhuinma'ñ mbidägy nej Dios tzocy. Yi janchtiy miich mhuinma'ñ'ajtpy nej jäy ajcxy tzocy.

³⁴ Huin'it Jesús huoomiñ yi' ydiscípulos ajcxy etz yi mayjäy, e chi nimay:

—Pen ji pinjaty xypanicxa'ñich, huen jäydigoydäy yci'mdzójcin etz huen xypanicxich jabom jabom. Oy nej ytimyjadiy ytimy'ayoohuipy. Jadu'n nipaady nej jihuiy ajcxy anajty mgruudz mgab'iccixy, etz naygiyéjigixy ma yi ó'cin huen ytimyñéjity müd ñch ycixpi. ³⁵ Huenpinjäy huídibi ca' yega'ñ yi yjugy'ájtín ma yi ó'cin müd ñch ycixpi, hue' je' yajtigoyamy yi'yjugy'ájtín. E huenpinjäy huídibi yegamy yjugy'ájtín ma yi ó'cin müd ñch ycixpi etz ñch y'ayuc oybi ycixpi, hue' je' ypadamyb yi jugy'ájtín huídibi ca' cixipy tigoyipy ni minaa. ³⁶ ¿Ti oy'ájtín yi' co tüg jäy y'ocnayaajpadíyb yi meeñ etz mic'ájtín (huídi yajpaatp ya ñaaxhuiñybi) e y'alma yjugy'ájtín cixipy tigoyipy tügcíy? ³⁷ ¿Jadu'ñyi jëb jäy y'alma yjugy'ájtín occojuyi? Nigi tzoohuin müdíty jäy ajcxy y'alma yjugy'ájtín, ca' jac ti. ³⁸ Huentimpínity yi huídibi xymidzo'ydúnibich yi n'ayucich ndiy'ájtich ma yi pocyjäydic yhuinduu huídibi tzinaayb cham ma jada naaxhuiñybi. Pues nañ jadu'n ñch, je jäy huídibi tzoon tzajpjoty, nmidzo'ydúnibich yi jadu'mbi jäy co ñch anajty nhuimbity ya naaxhuiñybi müd ñch nDeedy, je Dios Teedy, ymic'ajt y'oy'ajt etz müd tüg'óciy yi may'ángeles ajcxy tudägypi.

9

¹ Jadu'n Jesús yjacmīnañ:

—Janch tīy'ajt jadu'n nej ñch miich ajcxy cham nīmāy, co nijējity miich ajcxy huīdibi cham ma ñch nhuinduu, ca' m'ōgaangixy, ixti coonī ajcxy jayijp m'ixipy je Dios y'ané'mīn etz ymic'ajt.

Co Jesús ñinīcx yajtigajch

² Co tuctujc xīi naxy, chi Jesús mīd tzoōñ Pedro, Santiago etz Juan, e mīdpa'ttigīy ma tūg mijcop ma tūg it ooy ycīxity. E jīm copcīxy Jesús ñinīcx naygojtīgajtzni ma Pedro ajcxy yhuinduu. ³ Chi Jesús yhuit oy y'ahuimbity janch poob, e janch adīcxp. E ni pīn jadu'n yhuit cayajhuäch janch poob jadu'n nej je' anajty yhuit mīdity. ⁴ E chi oy nayguēxīgīyī ma ajcxy yhuindu Elías etz Moisés. Elías etz Moisés mīydacp anajty ajcxy mīd Jesús. ⁵ Huin'it Pedro nīmāy Jesús:

—Huīndzīn, janch oy jadu'n co ñch nyáajity. N'occojyīch ajcxy tugīg tijcquemy: tūg miich mje'; tūg Moisés yje'; etz tūg Elías yje'.

⁶ Com Pedro, Jacobo etz Juan ooy anajty chīgīyīgīxy, paady Pedro ca' anajty nejhuīy ti ycapxyp. ⁷ Tīm huīn'ítīy tūg joc yajnīdīgoy je' ajcxy, e mīdooy ajcxy ayuc jocjoty, e je ayuc ymīnañ:

—Jada je' ñch n'ung, huīdibi ooy ndzocyīch. Mīdo'mbīc miich ajcxy Jesús y'ayuc.

⁸ E tīm huīn'ítīy Pedro, Jacobo etz Juan ajcxy yujc'ijxy, e yja'ijxhuīdijty ajcxy, e ca' ni pīn ma ocjac'ijxni, jēda'ajty Jesús naydūgpajc.

⁹⁻¹⁰ Tī anajty choongixy copcīxy, e cidacp anajty ajcxy, co Jesús nīmāy Pedro, Jacobo etz Juan, co ca'

huaad yajm̄idm̄iydaaccixy p̄injaty hūidibi ajcxy anajty ti íjxcixy, ixti cooni ñich, je jāy hūidibi tzoon tzejpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacm̄iydägy m̄id jacp̄injaty hūidibi anajty ti íjxcixy. Per ooy ajcxy hūinmay etz naym̄idm̄iydáacigixy miñ xyipy ti Jesús ytijamy co yminañ: “N'ögibich etz njugypigipyich jadüg'oc.” ¹¹ Huin'it ajcxy Jesús y'amidooy:

—¿Na'amy co yi escribas yminañ co yi Elías hūidibi chinay jecy'ajty jayijp miinañ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydi je Cristo, e yaj'oyiydähuiipy hūinjemybi tüg'óciy m̄id Dios ycixpi. E nañ tiy'ajt jadu'n co jaybety ymiñ ma Dios ñecy co je Cristo, je jāy hūidib tzoon tzejpjoty, yajnaxa'ñ ayo'n etz tzaachyp̄i etz mayjāy ca' y'ixa'n̄iby. ¹³ ñich miich ajcxy nimaayb co je Elías ti je' yhuimbity ya naaxhuiñ, e je mayjāy ti túngixy m̄id Elías nej anajty tim tzójcixy. E cuyduñ ajcxy nej jaybety miiñ ma Dios ñecy m̄id Elías ycixpi.

Jesús yajtzögy tüg mutz'anäg hūidibi ca'oybi m̄id

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuim̄iy, chi ajcxy ijxy mayjāy jühuidity ma Jesús ydiscípulos ajcxy. Etz ijxy ajcxy nijëjity escribas hūidibi ayuc tzachyajtzib̄iyb m̄id Jesús ydiscípulos ajcxy. ¹⁵ E co je mayjāy íjxcixy nejhūiygixy co Jesús ti yhuimbity anajty, chi mic'amy ajcxy ninicxy Jesús poyigy,

e capxpoocxcixy, e may je' ajcxy ooy jihuüy huinmay. ¹⁶ Chi Jesús y'amidooy je mayjäy, nimay:

—¿Ti ayuc miich ajcxy mdzachyayjomyb mïd ñch ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïdmiiñ ñch nmang huídibi ymïd ca'oybi, e je ca'oybi ti yaj'umïyii. ¹⁸ E janam jadzojc je ca'oybi yajyachyii yajquïdyii ñch nmang, e oy cäy naaxcíxy, e ooy y'aa'opy ypidzimy, e nañ jadu'n oy ytïtz queety etz ñinïcx janch ögy yhui'my. Ti nbijctzoyich may'ajt mïd miich ndiscípulos ajcxy co huen yajpidzimgixy je ca'oybi ma ñch nmang, e ca' ajcxy ymadacy nicxy yajpidzimgixy.

¹⁹ Jesús nimay je mayjäy:

—Miich ajcxy huídibi jugy'ajtp jadachambi xii tiempo huídibi ca' mijpidägy Dios y'ayuc, ¿naag xii naag po' ñch njac-hui'mmïhuibich mïd miich ajcxy? ¿Naag xii naag po' n'ocmïmecxtuguipich miich ajcxy? Mïdmiin yi mmang ya ma ñch nhuinduu.

²⁰ Chi ajcxy mïdmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyach yajquïdy je pa'mjäy, e chi oy ciday naaxcíxy, e ooy yajch yquïdy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimïjt cujc yöy maabi mmang ypa'mbety?

Chi je ungededy y'adzooy:

—Ma'xung anajty co pa'mbedyii. Canaag'oc je ca'oybi yajyachyii yajquïdyii ñch nmang, ixti ti oy ycogidahuüy jinjoty etz ñijoty. Je ca'oybi canaag'oc jayaj'ögy ñch nmang. Pen miich mïd

tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

23 Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

24 Mic'amy je pa'mjäy yteedy mic ycapxy yminañ:

—Nmibijcyich, pubéjtcich nej huaad jacmij nmibicyich.

25 E co Jesús ijxy co nīgi mayjäy chach ymiñ poyigy ma yi', chi ix'ojoy je ca'oybi, e yminañ:

—Miich ca'oybi huídib ti yajhui'my jada pi'c'anäg uum etz nat, ñch miich yam n'ane'myb: “Pidzim ma yi pa'mjäy, e ca' mjactigihuipy ma yi yjot yhuinma'ñ jadüg'oc.”

26 Jayijp je ca'oybi yaaxqueecy janch mic, yajajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinïcx yhui'my nej jihuïy ti y'o'cni. Je mayjäy huídibi anajty ajcxy jim huindicxp yminaangixy:

—Ti ayooob y'ögy.

27 Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

28 Co Jesús ytigïy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co ñch ajcxy ca' ti nmadägyich nej nyajpidzimip ñch ajcxy yi ca'oybi?

29 Chi Jesús y'adzooy:

—Yijiibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac

ni nej huaad ypidzimi yi jadu'mbi ca'oybi, jëyi co Dios nmibijectzoohuim n'íjtim ayuu.

Jesús capxpídzimnip jadüg'oc co y'öga'ñ

³⁰ Chi Jesús mïd yi' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuñhuñyb ma yi' ñicxy. ³¹ Com Jesús hue' anajty yaj'ixpicy yi' ydiscípulos ajcxy, co ooy ycopícyity co yi jäy huídibi tzoon tzajpjoty, yajcïyegipy ma yi ymidzip, etz yaj'ögüñyb, e co anajty ti y'ögy codugüñg xii jadüg'oc yjugypigipy. ³² Jesús ydiscípulos ajcxy ca' huinjihuñy anajty Jesús y'ayuc, e nañ jadu'n tzigüñyb anajty ajcxy co Jesús yaj'ójip, paady ca' ajcxy amidoy nej huimbídzimi yijübi ayuc.

¿Pin je' ñigí jacmíjip?

³³ E Jesús mïd ydiscípulos ajcxy oyjaty jim Capernaum. Co ajcxy ytijectigüñy, chi Jesús yaj'amidoy ydiscípulos ajcxy, ñimay:

—¿Ti ayuc miich ajcxy naymïdmïydaácigixy jim ma anajty mdüyöyigixy?

³⁴ Per amonday ajcxy, com jëgixpi co anajty ajcxy ooy ti ñaymïdmïydaácigixy tüyöyjoty co pin jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je ñimajmetzpi ydiscípulos ajcxy, chi ajcxy ñimay:

—Pin nayyajnaxaanip mij, huen ity nej jihuñy ca' ytiijity e huen capxmïdoy ymígügtijc.

³⁶ Chi Jesús tzenígy tüg pi'c'anäg, e chi pidacy cujc'amy ma yi' ydiscípulos ajcxy. Chi tzenígy jadüg'oc, e ñimay ajcxy:

37 —Pín cöbije tügpajc pi'c'anäg jadu'n nej jada pi'c'anäg miid iich nxii ycixpi, iich yi' anajty ti xycöbicyich, e pín iich xycöbijcpich, ca nan iich anajty naydügpajc ti xycöbijcyich, nañ jadu'n anajty ti cöbicy huidi ti xyquejxich.

Pín iich ajt xycamidzip'ájtím, iich ajt je' mäd y'ity

38 Juan Jesús nimay:

—Huindzin, ti iich ajcxy n'ijxpaady tüg jäy co ca'oybi yajpidzimy miid miich mxii, e ti ngapx'aducyich miid co ca' yi' iich ajt xypahuidíjtím.

39 Per Jesús yminañ:

—Ca' mgapx'adugipy yi jadu'mbi jäy, com huenpínity huidibi mijhuinma'ñ tumb miid iich nxii, ca' yi' jibic xyñigapxich. 40 Com yi huidibi ajt ca' xymidzip'ájtím, yi' yi' miid iich ajt nbidzímim. 41 Janch janch iich miich ajcxy jadu'n nimäy co huenpinjäy huidibi ixypy miich ajcxy xyajni'uucp tüg vaso ni miid co miich ajcxy ti mmijnicxpety je Cristo, yi jadu'mbi jäy ypadamy yi' y'oy'ájtín ma Dios.

Je huidibi ooy ycojotmáyity co nicxy nbocycähüm

42 Huenpínity huidibi jibic-huinma'ñ mibidzimb, e yajpocycáy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayyajyöcxodzyii tüg paandzaa etz ñayñajtzbibihuiyb mejyjoty. 43 Pen miich mgi' xyajtundigoyamb jac'oy co mdim'ixpuxipy, com jac'oy co mdigihuiipy ma yi jugy'ájtín huinixibi cäduc, ca'ydi co Dios xypidägip miid metz mgi'

jiiby j̄in̄joty ca'oydactuuby, ma ȳi j̄in̄ ni camina ycap̄ich. ⁴⁴ Jiiby ca'oydactuuby ȳi ucxyting ca' y'ögy etz ni j̄in̄ ycap̄ich nicaminaaxii. ⁴⁵ E pen miich ȳi mdecy xyajpocycāhuamb, ixpux, com jac'oy co mdiḡihuip ma ȳi jugy'ájt̄in̄ huinix̄ibi tecytuc ca'ydi co mdiḡihuip m̄id̄ metz mdecy jiiby ca'oydactuuyb, ma ȳi j̄in̄ ni camina ycap̄ich. ⁴⁶ Jiiby ca'oydactuuby ȳi ucxyting ca' y'ögy etz ni j̄in̄ ycap̄ich ni caminaxii. ⁴⁷ E pen ȳi mhuiin t̄üg xyajpocycāhuamb, tim yajp̄idzim, jac'oy ȳi' co mdiḡihuip ma ȳi Dios y'ane'mdac m̄id̄ t̄ügpajc mhuiin, ca'ydi co mdiḡihuip ca'oydactuuby m̄id̄ metz mhuiin. ⁴⁸ Ma ȳi ucxyting ni caminaxii yca'ögy etz ȳi j̄in̄ ni caminaxii ycap̄ich, ⁴⁹ e ma nid̄üg'óciy ñi'cāgooda'ñ̄ j̄in̄ xut j̄in̄ ye'n tim jadu'n nej jāy tzüch caan x̄iducy. ⁵⁰ Ȳi caan ooy ȳi' y'öyity, pen ym̄id̄ x̄ücx'ájt̄in̄. Co je caan ytigoy yx̄ücx'ájt̄in̄, ca' ji ni ti hūidibi j̄eb̄ m̄id̄ nyajx̄ücx̄īȳim. M̄id̄'ájt̄cix̄ iich n'ayuc ma mjot mhuiinma'ñ̄, jadu'n iich n'ayuc nipaady nej caan, e tzina' miich ajcxy jotcuic m̄id̄ mm̄iḡügt̄ijc nid̄üg nid̄üg.

10

Jesús yaj'ixpicy m̄id̄ co jāy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijñi n̄inaxy x̄i yp̄idzimy'amy. E mayjāy ooy ñayyöymujci ma Jesús anajty yajpaady. E Jesús yaj'ixpicy je mayjāy jadu'n nej anajty yaj'ixpicy'adyii. ² Chi nij̄jity fariseos ajcxy ñicxy ma Jesús anajty yajpaady. Hue' ajcxy yhuinma'ñ̄ p̄idaaccixy co anajty Jesús tzu'ixaangixy. Chi ajcxy y'am̄idooy, pen huaad

tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jëb huaad ixmach ytöxyijc, e möhuiipy ñinecy ñidiy'ajt co nej ñay'ixmáztzigixy, e jadu'n anajty ti y'oyiy nej jëb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín mïid miich ajcxy ycixpi, co ooy miich ajcxy mdzaccapxycómídodaaccixy ca' mgapxymídohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'ócíy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytajyteedy etz pudigihuiipy yi' ytöxyijc. ⁸ E je yëydijc etz ytöxyijc tú'cíy idaangixy. Paady je yëydijc tüg mucy yajpaady mïid ytöxyijc. ⁹ Com yi' huídibi Dios ti huijtz mucy, ca' ni pín huaad huijtzhuägy.

¹⁰ Co Jesús mïid ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huídibi anajty ti yaj'ixpicy ma je píjcín. ¹¹ Chi Jesús yminañ:

—Je yëydijc huídibi ti ixmach yi' ytöxyijc, e picy mïid huingbi, hue' yi' anajty ymidundigooyb yi' ytöxyijc huídibi mïid jayijp ypijcy. ¹² Nañ tim jadu'n co tüg töxyjäy ixmach je yëydijc huídibi mïid ti ypicy jayijp, e ypijctigach mïid huingbi yëydijc, hue' ymidundigooyb je yëydijc huídibi mïid ti ypicy jayijp.

Jesús conucxy pi'ctijc

13 Je huin'it tiempo jäy ajcxy m̄id miñ pi'ctijc ma Jesús, jaydëb c̄in̄xajy etz conuucx̄ip. Co Jesús ydiscípulos ajcxy jadu'n ijxy co jäy ajcxy nim̄ijhuägy Jesús m̄id ajcxy ypi'c'ung, chi je' ydiscípulos ajcxy ix'ojoy je jäy ajcxy. 14 Co Jesús jadu'n ijxy nejhūiyy nej yí' ydiscípulos ajcxy y'id̄ich, chi ojoy ajcxy, ym̄inañ:

—Ooy y'óyity co je pi'ctijc ajcxy xyñim̄ijhuägyich, ca' miich ajcxy mgapx'aducy. Com yí jäy ajcxy hūidibi yajpatp ma Dios y'ané'm̄in, jadu'n ajcxy nipaady nej pi'ctijc. 15 Janch ìich miich ajcxy nim̄äy co pinjaty hūidibi ca' cōbiga'ñ Dios y'ané'm̄in, jadu'n nej pi'ctijc cōb̄ijccixy Dios y'ané'm̄in, hue' yí jadu'mbi jäy ajcxy ca' ytiḡihua'ñ ma yí Dios y'it lugar.

16 Chi Jesús am̄inenmujctay je pi'ctijc ajcxy, e chi c̄in̄xajiy etz conuucxcixy.

Tüg mutz'anäg comeeñybi ym̄iydägy m̄id Jesús

17 Co Jesús chooñ jadüg'oc, chi ñimiini poȳigy tüg yēyd̄ijc, ycojxt̄inay'ahūiy ma Jesús yhuinduu, e ym̄inañ:

—Miich, oybi Huindzin, ¿ti huaad ndun̄ipyich jigix jēbi nbad̄ipyich jugy'ájt̄in hūidibi ca' ycix̄ipy ytigoȳipy?

18 Chi Jesús ym̄inañ:

—¿Na'amy co xyñim̄äyich co oy huindzin ìich? Dios tügpaic óyip, ca' jac ni pin. 19 Miich mne-jhūiyyb Dios ycōt̄ujc̄in hūidibi jadu'n m̄inaam: “Ca' mm̄igapxt̄igoȳip tōxyj̄äyd̄ijc; ca' mj̄äȳaj'öḡipy; ca' m̄meedz̄ip; ca' m'̄indaac̄ip; ca' pin m̄huin'̄in̄ip; etz myajm̄ij'ad̄ip mdaj m̄deedy.”

20 Chi je jäy Jesús nim̄äy:

—Huindzin, ti nguydundäyich jadayaab cötújcin ajcxy maabi ich nbi'c'atyich.

²¹ Chi Jesús huindixpejty je yëydjic müid tzójcín jihuüyin, e chi nimay:

—Per jactigoy'ijtni jadügnax. Nicx toog tüg'óciy huídijaty miich mmüid, etz mo' yi ayoobtjic. Co jadu'n mdunipy, chi mbaadipy oy'ájtín jüby tza-jpjoty. Co jadu'n mdooctähuipy tijaty miich müid, chi minip jadüg'oc ma nyajpaadyich, e xypañicxibich, e mnaybidägiib cixyot huinjot oy nej mdimyjadipy müid ich ycixpi.

²² Co jadu'n je yëydjic midoy nej anajty Jesús ti ñimäyii, chi yhuim'y taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixty co je comeeñybi taj may yhuimbijtni, chi huindixpejty je' ydiscípulos ajcxy huídibi tinaayb jühuídity ma yi', e ymíñañ:

—Ooy chachtzípity co tüg comeeñybi ytigihuipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuídity müid jada ayuc nej Jesús anajty ti ymíñañ. Paady Jesús yjacmíñañ jadüg'oc:

—Miich ajcxy migügtjic huídibi ooy ndzocyich, ooy chachtzípity co ytigihuip ma Dios y'ane'mdac tüg comeeñyjäy huídibi tzachnijot'ajt ycomeeñ'adii. ²⁵ Nigi chípity co tüg comeeñ jäy ytigihuip ma Dios y'ane'my, ca'ydi co tüg camello ñaxipy ma tüg xu'ñ'ix yxútity.

²⁶ Co jadu'n ajcxy midoy nej Jesús ymíñañ, chi ooy ajcxy yhuinmay'ahuídijty, e nayñimáayigixy miñ xyipy:

—Pen janch tiy'ajt jadu'n, ¿pinjäy jada' huaad jëb y'alma ñëdzögipy?

²⁷ Je huidibi jäy ajcxy ca' ni minaxii huaad ca' yaj'oyïy, Dios yi' yaj'oyihuip, com mïid Dios ca' yi' ni ti chípity.

²⁸ Chi Pedro yminañ:

—Huindzin, occuendtun, ïch ajcxy ti n'ixmajztäyich tüg'ócïy tijaty anajty nmïidich, e ïch ajcxy nbanicxpïch miich.

²⁹⁻³⁰ Chi Jesús y'adzooy, minañ:

—Janch tiy'ajt nej ïch miich ajcxy nimäy co huenpínity huidibi mïid ïch ycixpi ti ixmach ytïjc, ti ixmach y'uch ymïgüg ajcxy etz ytaj yteedy, etz ytöxyïjc, etz y'ung ajcxy, etz nañ jadu'n ti ixmach ycam ïch ycixpi, etz ïch n'ayucich etz mïid Dios ytïy'ajt ycixpi, yi' ypadamy nïgi oy'ájtïn ya naaxhuiñ, ixti ypadamy mïgo'px jadu'ñyi ytïjc ajcxy, y'uch ajcxy, ytaj ajcxy, y'ung ajcxy, etz ypadamy nïgi ymïj cam, mïid tzaachypi mïid ayo'n mïid ïch n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtïn huidibi ca' ycixipy ytïgoyipy. ³¹ Ji yajpaady ya naaxhuiñ nijëjity jäy huidibi cömay ijtp, e co yjäty ajcxy tzajpjoty, chi ca' ajcxy cömay ida'ñ. Nañ jadu'n ji yajpaady ya naaxhuiñ nijëjity huidibi ca' cömay y'ity, e co ajcxy yjädiipy tzajpjoty, chi jiiby ajcxy cömay y'idipy.

Jadüg'oc Jesús capxpïdzïmnïp co y'öga'ñ

³² Jesús mïid ydiscípulos tüyöyp anajty ajcxy, hue' anajty ypättigïygïxy jim Jerusalén. Jesús jayïjp anajty ñicxy, e je' ydiscípulos ajcxy etz nañ jadu'n mayjäy panicxy anajty ajcxy Jesús. Je Jesús

ydiscípulos ajcxy ooy chachhuinmay'ahuídjtcixy, e jacjadyii jáy huídibi anajty ypanicxy Jesús ooy ajcxy chigiiygixy. Chi Jesús huodzooñ abicy je majmetzpi ajcxy, e yajmüdmíydactay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuüyb co nnícxim cham jim Jerusalén. E jim Jerusalén, üch je jáy huídibi tzoon tzajpjoty, nyajcüyega'ñich mach ma yi Teedy mïjtungmüdpi, etz ma yi escribas ajcxy. E chi ajcxy ane'min pidäga'ñ co huen xyaj'öcixich. Nañ jadu'n xycüyegaangixich mach ma yi' ajcxy huídibi ca' yjudiojäyity. ³⁴ Yi' ajcxy xyñixigipy xyajxigibych, xyhuobipyich ajcxy müid coochac, xyhuindzuj xyjijptzújibich ajcxy, e xyaj'ögibich ajcxy. Codugüg xii maabi anajty xyaj'öccixyich, chi njugypigipyich jadüg'oc.

Jacobo etz Juan pïjctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich müid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuüibich yi mij tung ma m'ané'min jaydeb n'ñähuüibich ma miich mmijc. Nidügti üch ajcxy n'ñähuüipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuïy ti ti mbijctzoogixy. ¿Nej myajnaaxamyb miich ajcxy je tzaachypi ayo'n huïdibi nyajnaaxamybich, jadu'n nej jihuiy m'üga'ñ ajcxy ïch n'ügy e mbaada'ñ ajcxy ïch nniibéjtín?

³⁹ Jacobo etz Juan y'adzooy:

—Ïch ajcxy nmimadägibich minaxipyich nyajnaaxipyich ajcxy yi tzaachypi huïdibi mminaxamyb myajnaaxamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaaxaangixy yi tzaachypi jadu'n nej ïch nminaxaamyich nyajnaaxaamyich yi tzaachypi, tim jadu'n nej jihuiy m'ügaangixy ïch n'ügy, e mbadaangixy ïch nniibéjtín. ⁴⁰ Per ca' ïch cötújcín nmídidyich co ïch miich ajcxy nbidägipy tungmíid, co myajpaadíp tüg ma ïch nmijc a'oy'amy, e jadüg anajty'amy. Hue' janchtiy Dios Teedy ymíid ni'ixi' pinjaty ti huin'ixy jaydéb yajnícxip je mïjtung ma ïch n'ané'mín.

⁴¹ Co je jacjadyii Jesús ydiscípulos ajcxy nejhuïy jadu'n nej Jacobo etz Juan may'ajt pijctzoy ma Jesús, chi ajcxy ooy mïjotmäty Jacobo etz Juan.

⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuïygixy, yi jäy ajcxy huïdibi mïjtungmíid ma je maybi naax cajp, mic ajcxy ane'my je naax cajp. Nañ jadu'n yi' ajcxy huïdibi mic'ajt míid ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej mïjtungmíidpi ma je maybi naax cajp. Pinjaty ma miich ajcxy mïjtung

yajnicxaamb, copicy ñaybidägiyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägiyb nej tüg tumbi. ⁴⁵ Com ñich nañ jadu'n, je jäy huidibi tsoon tzajpjoty, ti nmiiñich ya naaxhuiñ jaydëb nbubedipyich yi mayjäy ajcxy, e ca' nan yi mayjäy ñich xypubedipy. Ti nmiiñich jaydëb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'na'ñich yi jäy ajcxy y'alma.

Jesús yajtzögy Bartimeo huidi anajty huíntzíp

⁴⁶ Chi oy jäty Jesús mïid ydiscípulos ajcxy jim Jericó. E co Jesús tzoofñ Jericó ytübijcy jadüg'oc, chi yi' ydiscípulos ajcxy etz janch mayjäy ñíxcixy anajty mïid Jesús. Co ajcxy ycajp pidzimy, chi tüba'ay anajty yajpaady tüg huíntzípí huidibi limosna anajty ypijctzooyb jabom jabom. Hue' anajty yxii Bartimeo, e Timeo anajty xiiijity yi' yteedy. ⁴⁷ Co Bartimeo nejhuüy co Jesús je Nazaretpí najxp anajty ma je tü'aa, chi mic yaaxqueegy ymíñañ:

—Jesús, David y'ap y'oc, tun may'ajt ñich pa'ayoog.

⁴⁸ Chi je mayjäy ajcxy ojy je huíntzípí, nímaj ajcxy co huen amofñ. Per je huíntzípí niği ymínan'idíich:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxijpy, e ymíñañ:

—Huomiingix yi huíntzípí.

Chi je jäy ajcxy oy yajtzoongixy je huíntzípí, nimaaygixy:

—Jotcugi', e pidíg, com Jesús xyaxtzoob.

50 Chi mic'amy je huintzpi, najtz'oxi'y je ñibe'ñ, chi ypidi'gy, e ninicxy Jesús. 51 Chi Jesús je huintzpi y'amidooy:

—¿Ti mdzojcpy nduni'pyich m'id miich ycixpi?

Chi je huintzpi yminañ:

—Huindzin, ndzójcpyich co xyajhuindicxi'gibich.

52 Chi Jesús je huintzpi nimay:

—Jëb mnicxy ma mdi'c. Com ti xymibicyich, paady ti mhuindicxi'gy.

Tim huin'it je huintzpi yhuin'oyi'y, e yhuindicxi'gy, e panicxy Jesús co ytubi'jcy jadüg'oc.

11

Jesús yti'gy jim Jerusalén

1 Co Jesús etz je mayjäy o'yá'tcixy huington ma je Jerusalén cajp ma yajpaady mejtz mutz cajp huidi xi'jipy Betfagé etz Betania, huington ma je cop huidibi xi'jip Olivos, chi Jesús quejxy metz ydiscípulos huen nicxy jayijp. 2 Jesús nimay je metzpi ydiscípulos:

—Nix miich ajcxy ma yijimbi cajp huingtonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuut'cix je burro e yajmiingix ya ma ich.

3 Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähui'py: “Je Huindzin (Jesús) yajtunamyb tzojc, e yajhuimbidamy mic'amy.”

4 Chi je metzpi ydiscípulos ñicxy ma je cajp huingtonbi, e oypaat'cixy tüg burro ycoxóchity huington ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huingon ymíñañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmídmíydacy Jesús y'ayuc nej anajty ti ñimäyíi. Je jäy ajcxy ymínaangixy co jëb yajníxcixy je burro. ⁷ Míc'amy ajcxy mija'ty je burro ma Jesús yajpaady. Je Jesús ydiscípulos ajcxy jibe'ñ je burro ajcxy míid yjocxhuit, chi Jesús yaj'íñay je burro. ⁸ Mayjäy ajcxy ooy yëby yhuit tügüjc ma Jesús anajty ñaxa'ñ, e jacjadyíi jäy pujxy ajcxy quípy'aacx, e pídaaccixy tügüjc.

⁹ Je mayjäy huídibi anajty ajcxy nícxp jayíjp etz axam ma Jesús, chi ajcxy ytigüy capxp míc, ymínaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idípy jada yëydíjc huídibi mimb míid yi nHuindzin Dios yxíi etz ymic'ajt. ¹⁰ Huen capxpaady y'idípy je ané'mín huídibi jada Jesús yajtzondacp cham. Jada je' je ané'mín huídibi nmij'ap nmijteedy David anajty ymíid. Hosana, huen je tzajpjoty tzínaayb ajcxy íbaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytíjc. Co huíndíxtay tüg'óciy tijaty jii by tzajtigoty, chi chooñ jii by, e ñícx y jim ma je cajp huídibi yxíi Betania. Chi Jesús je majetz ydiscípulos ajcxy míidnícxy.

Jesús capxpocy je higueri ca'pi anajty ytím

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús íjxpaty jiguëgy tüg

higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymïd ytïm. Co Jesús ymech ma je higueri, chi ijxy co je higueri ca' anajty ytïm mïdity, jëyi mïdity anajty y'aay, com ca' anajty ni tiempity mina higo ytïm'aty. ¹⁴ Chi Jesús migapxy je higueri ñimay:

—Jadu'n nej tiempo yjacnicxni, ni pin cajacpaadipy higo tïm ma miich.

Chi Jesús ydiscípulos ajcxy midoy nej Jesús ñimay je higueri.

Jesús quejxpïdzïmday ajuybi adoocpi ma Dios ytïjc

¹⁵ Co ajcxy oy yjädy jim Jerusalén, co Jesús ytigiy jadüg'oc jiiby ma Dios ytïjc, chi Jesús yajpïdzïmday je ajuuybi adoocpi ajcxy jiiby tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huïdibi muuxy toocp. ¹⁶ Jesús ca' anajty tzocy co pinjaty midigïhuipy juydoogy ma Dios ytïjc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Ëich ndïjc hue' je' tzajpcapxcapxtac ma tüg'óciy jäy ajcxy chooñ ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpïtïjc.

¹⁸ Co ajcxy je teedy mïjtungmïdipi etz je escribas nejhuïy nej anajty Jesús ti y'idïch jiiby ma Dios ytïjc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigïyb ajcxy mïd je mayjäy com je mayjäy ooy tzachjïhuïy huinmay jadu'n nej

Jesús yaj'ixpájcigixy. ¹⁹ Co oycoodzhyñi, chi Jesús ycajppidzimy.

Je higueri ytätzni

²⁰ Je com jabom Jesús mïd ydiscípulos ajcxy najp anajty tim jopyñi ma je higueri anajty ytinäy. E je higueri ti anajty ytätztay mabaad ytictz. ²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huídibi ixiy mgapxpojç, ti yi' ytích.

²² Chi Jesús Pedro nimay:

—Mibic yi Dios. ²³ Janch ñich miich ajcxy nimäy, co ixypy pin migapxy jada huingtonbi cop, e nimäy ixypy: “Miich cop pidäg, e nicx cidäg mejyoty”, pen ca' ti mijotmetzcüy, e mibicy co jadaanip nej yi' ti ane'my je cop, chi jadu'n ytunüyb yjadüyb. ²⁴ Paady ñich miich ajcxy nimäy co tüg'ócüy ti-jaty miich ajcxy mbijctzooyb ma Dios, chi Dios xymöhuipy ajcxy huídibi ti mbijctzoogixy. Pen janch miich ajcxy mibicy co Dios ti xymooygixy ajcxy je huídibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy mïd tüg jäy, huinméxcix yi mmidzip tim jayijp, jigix jëbi Dios Teedy huídib jüby tzajpjoty xyhuinmeecxip miich ajcxy ma ti mdundigooygixy. ²⁶ Pen ca' miich ajcxy mhuinmecxy yi mmidzip huídibi ti xymidundigooygixy, ca' miich ajcxy xyhuinmecxa'ñ Dios Teedy huídibi yajpatp tzajpjoty.

Jesús je' ycötújin

27-28 Je huin'it tiempo Jesús miid je' ydiscípulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjity huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiiñ ajcxy Jesús, e ymīnañ ajcxy:

—¿Pīn cōtújcīn tī xymōy huidibi tī mduñ ya tzajtigoty? ¿Ma cōtújcīn tī mbaady co jēb m'ane'my ya tzajtigoty?

29-30 Chi Jesús ymīnañ:

—Ich miich ajcxy nañ jadu'n nyaj'amidohuamyb tūg ayuc. E pen mni'adzooyb ajcxy, huin'it ajcxy nyajnimāhuipy ma ich tī nbaady yī mic'ajt etz yī cōtújcīn, co jadu'n nduñich jīby tīgoty ma Dios ytjic. ¿Pīn yajñibjic Juan, je Bautista, co huen jāy yajñibety? ¿Dios, o naaxhuiñjāy? Adzoogich ajcxy.

31 Chi ajcxy ytigūy huinmay'ahuidijtpi, ñayñimāayigixy miñ xyipy:

—Pen mīnaanīm co Dios tzajpjotypi tī yajñibicy Juan, chi Jesús xyñimāayimipy: “¿Nej co ca' miich ajcxy mībijcy Juan y'ayuc?” 32 Nañ ni ca' jēbi ich ajt nmīnaanīm co jāy ajcxy tī quejxy Juan.

Com chigūyb anajty jāy com ñejhuīyb anajty ajcxy co Juan je Bautista Dios anajty ytīy'ajt ymīd.

33 Chi ajcxy Jesús nimay:

—Ca' ich ajcxy nejhuīy pīn tī yajñibicy Juan.

Chi Jesús ymīnañ:

—Ich nañ jadu'n ca' nnigapxañich pīn tī xycōtujcmōyich co jēb nduñich huidibi ndumyibich.

12

Je naymidúnipitjic jibicjäybi ajcxy y'ijxpejt

¹ Je huin'it xii Jesús jacmığapxy je mayjäy miid jihuimbit ayuc, yminañ:

—Ji yajpaady tüg yëydjic huidibi camuuxy ti cojy ma ycam, e ti co'aguemy je camuuxy cam, e yaj'oyiiy tügi tang ma huinmicxa'ñ je camuuxy. Nañ jadu'n je yëydjic tüg poch yajpidigy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjity tumbidjic. Chi chooñ viaje tumbi jigüegy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidjic yéjccixy je cosechi, jadu'n nej anajty ti ycapxytuñ miid je' ajcxy. ³ Chi je cam tumbidjic ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'nyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidjic ajcxy tza-agäch je mîmetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidjic yaj'o'cy je midugiiğpi quexyöpy. Chi je cogam jac tim quejxy jadyii ytumbi. Chi je tumbidjic ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶ Je cogam ymiid anajty tügpajc ymang huidibi anajty ooy tzocy jihuıy. Je' oy quejxcogixiiy ma je ycam yajpaady. Je cogam huinmay jadu'n co je tumbidjic ajcxy yajmij'adiıyb je' ymang. ⁷ Chi je tumbidjic ajcxy ñayñimaayı miñ xyıpy: “Jada

yëydijc je cogam jada ymang huidibi jë'adaanip je yteedy ypidägy. Tzoc yaj'ó'cim, e jadu'n je cam një'ájtím.”⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi ymínañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam miid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n ymínañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huidibi je pojtzpidijc ca' ajcxy yajtuna'ñ, e je' oy ti yhuimni ma anajty yjaccopicyity.

¹¹ Jada tung je Huindzin Dios ti tuñ, e ooy oy n'íjxim njäygidaacim.

¹² E huin'it je judíojäy ajcxy ytungmiidpi ooy jamadzaañ anajty Jesús, com ñejhuuyb anajty ajcxy co Jesús ñigapxyii yi' ajcxy. Com tzigiiyb anajty ajcxy miid je mayjäy, chi ajcxy tim huinyöyducy, chi ñíxcixni.

Yajnidiiygixy pen jëbi cogüéjtín yajyecy o pen ca'

¹³ Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytijc. Tügpiicy anajty ñaygomájtzigixy miid yi fariseos ajcxy, etz jadügpiicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús.

14 Jada mejtzpicypi ixpicytjic ñicxy ajcxy ma Jesús, e ymínañ ajcxy:

—Huindzin, ñich ajcxy nejhuñyb co myaj'ixpijcy je tıy'ajt, ca' jäy mdzigıy, com ca' huin'ixpety myaj'ixpıcy. Tú'cıy miich mduñ mıid mic jäy, mıid comeñyjäy, etz mıid ayoob jäy. Tudägy jäy ajcxy myaj'ixpıcy jadu'n nej huaad ajcxy cuychinaaygıxy Dios ytıy'ajt. Nejhuñhuaamybıch ajcxy nej miich yaj'ixpijcpy je mayjäy. ¿Nej tundıgooyım mıid yı Dios ycötújcın co nmıgüéjtim César, je romano jäy mıj'ane'mbi, o ca'ji? ¿Nej jëb nmıgüéjtim, o ca'ji?

15 Per Jesús ñejhuñyb anajty ajcxy yjıbıch-huinma'ñ, e chi ajcxy nımay:

—¿Na'amy co miich ajcxy xyjot'ixy xyhuinma'ñ'ıxyıch? Yajmiingıx tüg meen jıgıx n'oc'ıxıpyıch.

16 Chi ajcxy mımiıñ tüg meen e co Jesús ijxy je meen, chi ymínañ:

—¿Pın y'ahuanax etz pın yxıı ijtp ma jada meen?

Chi ajcxy y'adzooy:

—Hue' yı' César.

17 Chi Jesús ymínañ:

—Mo' je César huıdibi yı' yjë'ajtpy, e mo' Dios huıdibi Dios yjë'ajtpy.

Chi ajcxy ooy jıhuıy huınmay jadu'n nej anajty Jesús tı y'adzooy.

Yajnidıygyıxy pen je tııbı öccıxy jugypıgıpy jadüg'oc

18 Je huın'ıt tiempo nijëjıty saduceos ajcxy ymiıñ ma Jesús. Yı saduceos ajcxy ymınaangıxy co ca' pın yjugypıga'ñ tııbı y'o'ccıxy. 19 Chi je saduceos ajcxy Jesús nımay:

—Huindzin, Moisés jayhui'my je cõtújcın co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypiğıpy mïid ña'y y'uch yëydijcpi jigix jëbi je töxyjäy y'ung'ixipy huıdibi hui'mihuiıp jadu'n nej codijc cobıdägy ma je yteedy y'ajch ypidägy. ²⁰ Pues jim ma tüg cajp anajty chinäy huıxtujc yëydijc tüg que'x. Je ungoob ypijcy, e chi ix'o'cy ytöxyijc, e ca'ni tüg y'ung yajhui'my. ²¹ Je mımetzpi yëydijc ypijcy mïid je co'ögytöxyjäy, e nañ jadu'n ix'o'cy ytöxyijc e ca'ni tüg ung yajhui'my. E nañ jadu'n je midugııgpi mïid ypijcy je töxyjäy, e nañ jadu'n ix'o'cy je ytöxyijc, e ca'ni tüg y'ung yajhui'my. ²² E jadu'n oytuñyii yjadyii mïid je töxyjäy co ti anajty mïiddzinay'abıdzımdäy je nihuıxtujcpi yëydijc tüg que'xpi. E je nihuıxtujcpi ix'o'cy ajcxy je töxyjäy, e ca'ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tiıbi ajcxy y'ögy, ¿huıdibi jada' ajcxy nidücti je yëydijc töxyijc'adaanıp je töxyjäy? Com ti ajcxy jadu'n nihuıxtujcpi mïid tzinay'abıdzımgıxy.

²⁴ Chi Jesús je saduceos ajcxy nimay:

—Miıch ajcxy ca' mhuinjihuıy je tiy'ajt, com ca' mhuinjihuıygıxy Dios y'ayuc ytiy'ajt, e com ni ca' mnejhuıygıxy je mic'ajt huıdibi Dios ymïid. ²⁵ Pues co anajty yjugypıjccıxy je jäy tiıbi y'ó'ccıxy, chi ca' ajcxy ypiğa'ñ, e nañ jadu'n ni ca' ajcxy ñaymöhuiıyb y'ung huen piıccıxy. Hue' ajcxy yjugy'adaangıxy chinähuaangıxy jiıby tzajpjoty, tim jadu'n nej je ángel ajcxy chinaaygıxy yjugy'ajtcıxy. ²⁶ Per je tiy'ajt co jäy ajcxy tiıbi

y'o'ccixy yjugypigaangixy, ¿nej ca'ni mgapxyni Moisés ytiy'ajt ma anajty Dios ymígapxyii co je aay ujtz anajty chachtoy? Chi ymínañ: “Íich je' je Dios huídib Abraham, Isaac etz Jacob yDios'ajtpy.”
²⁷ Com yí Dios ca' yí yDios'aty ma yí öcpi ajcxy huídibi y'alma ti ycixy ti ytigoy. Yí Dios Dios'ajtp yí' ma yí juugypí ajcxy. Paady miich ajcxy ooy mij mdundigooygixy co ca' mhujnihuiyigixy Dios ytiy'ajt.

Je ané'mín huídibi ooy nügí ycopícity

²⁸ Nañ jadu'n je huin'it tiempo nimiiñ Jesús tüg escriba. E yí' anajty y'amído'ijtpy co Jesús adzooy je jäy huídibi ca' mibicy co yí öcpi yjugypigipy ajcxy jadüg'oc. Jada escriba ñejhuíyb co Jesús ooy oy ti y'adzooy je saduceos ajcxy, paady yí' Jesús amídooyi:

—¿Huídibi je' Dios y'ané'mín jacmijpi?

²⁹ Chi Jesús y'adzooy:

—Yí Dios ycötújcin huídibi jaccopícyip, yí' je' huídibi mínamb: “Mídoogix Israel jäy, je Huindzín Dios huídibi nDios'ájtím, yí' je' ajt nHuindzín Dios tügajcpi. ³⁰ Tzoc jihuí' etz yajmij'at mHuindzín Dios míid tüg'óciy m'aa mjot etz míid tüg'óciy m'alma, etz míid tüg'óciy mhujnma'ñ, etz míid tüg'óciy mmic'ajt.” Jada je' je jaccopícyip ané'mín.

³¹ Je mimetzpi Dios ycötújcin jahueengi tú'ciy ñaybadyii míid je jayijpi, yí' huídibi jadu'n mínamb: “Tzojccix jihuíygix yí mmígügtijc tím jadu'n nej mnaychogyii mnayjihuiyíi ci'm.” Jada metz Dios ycötújcin jaccopícy jacmic'ajt míid ca'ydi jac huídibi cötújcin.

³² Chi je escriba ymínañ:

—Ooy oy ti m'adzooy. Janch tıy'ajt jadu'n nej miich mına'ñ, co ji yajpaady tügpaajcpi Dios, e ca' ji jadüg Dios mic'ajt müdipi. ³³ E janch tıy'ajt co copıcy nmıjıpıdaacım nyajmıj'ájtım Dios cıxyjot huınıjot müd tüg'óciy ajt nhuinma'ñ, müd tüg'óciy ajt n'alma, etz müd tüg'óciy ajt nmıc'ajt. E copıcy ndzójcım njihuıyım nmıgügtıjcım tim jadu'n nej naychójcım nayjihuıyım cı'm. Jactzoobatp jada ca'ydı co tüg'óciy yi huındzıgı'ñ huıdıbi anajty yajno'cpi müd Dios ycıxpi.

³⁴ Co Jesús ijxy jadu'n nej je escriba tıydudägy anajty ti y'adzoyii, chi ymınañ:

—Jahuenjaty miich mmıbíjcin ytıgoy'ityñi jaydéb mdıgıhuıpy ma Dios y'ane'my.

Co Jesús anajty jadu'n ti y'adzooy je escriba, chi ca' jac pın ti ayuc yjacyaj'amıdoohı.

¿Pın je' y'ung je Cristo?

³⁵ Jesús yaj'ıxpıjcpy anajty je mayjäy jııby ma Dios ytıjc, e ymınañ:

—¿Na'amy co yi escribas ajcxy ymınaangıxy co Cristo hue' je' David y'ap y'oc? ³⁶ Com je Espıritu Santo ymoy David jada ayuc huıdıbi jaybety ma je Salmo necy ma jadu'n ymınañ:

Yı Huındzın Dios nımay ıch nHuındzın: “İña' ya a'oy'amy ma ıch nmıjc, ıxtı coonı anajty miich mmıdzıp ti nmımadactäyıch, jadu'n nıpaadıpy nej jıhuıy ti nbıdägyıch miich mmıdzıp jadu'n nej tüg tınaybejt.”

³⁷ ¿Per nej co yjadu'nıty co jäy ajcxy ymınaangıxy co je Cristo David je' y'ap y'oc? ¿E David cı'm ymınañ co je Cristo yi' yHuındzın'ajtpy?

Jotcuıjc anajty je mayjäy amıdoo'ıjti Jesús y'ayuc.

Jesús ca'p jäygidaci leyhuindzin ajcxy yhuinmañ

³⁸ Jesús yaj'ixpijcpy anajty je mayjäy, e yminañ:

—Naycuend'ájtigix miid yi escribas ajcxy. Com yi escribas ajcxy ooy jotcuyc co nayxójxigixy miid yhuít oyjatypi yoñjatypi. Ooy ajcxy tzocy co yaj-capxpócxixipy huindzigi'ñ'amy mayjäyduum. ³⁹ Yi escribas ooy ajcxy tzójccixy yi cödumbi iñaybejt ma je naymujctac, etz ooy ajcxy tzójccixy iñaybejt ma yi cömaybi jäy iñay ma jäy ajcxy yx#duñ. ⁴⁰ Yi escribas ajcxy yajcijxtaayipy yi co'ögy ytöxyjäy ypidägy miid ajcxy y'adzójin. Yi' ajcxy ooy túngixy jecy tzajp-capxycapxi jigix ajcxy capxpaady idipy. Dios nigí tzaachytunipy yi escribas ajcxy miid ypocy ycixpi, ca'ydi jac ni pin.

Je ayoobi töxyjäy y'ofrendi

⁴¹ Tüg xii anajty Jesús iñay jilby tigoty ma Dios ytijc. Iñaayb anajty ma je limosna caja huinduu. Jesús yhuindicxyp anajty je jäy ajcxy huídibi meeñ pidaaccixp ma je ofrenda caja. E maycomeeñyjäy ooy ymeeñ pidaaccixy janch may. ⁴² Tim huin'ítiy yja'ty tüg co'ögy töxyjäy janch ayoob pidacy metz pi'c meeñyhuäcxy, huídibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pin. ⁴⁴ Tüg'óciy comeeñydijc ajcxy ypidacpy ma y'ofrenda yi meeñ huídibi yajconaxyp. Jadayaabi co'ögytöxyjäy ti pidacy tüg'óciy huídibi anajty ymiid, je meeñ tüg'óciy huídibi anajty ñigayamy yi' ymooyb Dios.

Jesús yminañ co Dios ytijc yhuindigoopy

13

¹ Co Jesús ypidzimy ma Dios ytijc, chi nidügti ydiscípulos ñimayi:

—Huindzin, ix jada maychaa mijjatypi etz jada maybi tijc ooy y'oy'oydúñity.

² Per Jesús y'adzooy, yminañ:

—Huindicx miich ajcxy jada maybi mijjaty ytijc. Minip tiempo mina tüg'óciy jada tijc nicxy yhui'my taj xit, ca' ma tzaa macxy. Huindigoydähuijp tüg'óciy.

Je tiy'ajt ma ca'ni naaxhuiñybi ycixa'ñi ytigoya'ñi

³ Jesús mïd ydiscípulos ajcxy ñicxy ma je cop huídibi xijip Olivos. Jim ajcxy co'ijxnaxy je Dios ytijc. Hñayb anajty Jesús jim copcíxy co Pedro, Jacob, Juan etz Andrés ameech migapxy Jesús, yminaangixy:

⁴—Tun may'ajt ich ajcxy yajnimaayg mina jada ytuna'ñyii yjada'ñyii co huindigoydähuijp Jerusalén cajp. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos yminañ:

—Ix pinjaty xyhuin'ingixy. ⁶ Ooy jäy may yminañ mïd ich nxii. Ñaydijáanigixy co je' ajcxy je' je Cristo, ymina'na'ñ ajcxy: “Ich je' je Cristo.” E ooy jäy may huin'inaangixy.

⁷ Co miich ajcxy ayuc mmïdohuiipy co jäy chachchiptungixy xii ya, ca' mdzigüygixip, com ooy ycopícyity co jada jadu'n jayijp ytuniiyb yjadiyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidigüib tüg naax cajp mïd huingbi naax cajp, e gobierno mïd huingbi gobierno. E minipy mic uyx canaag'it etz mij yuu mijpa'm

xii ya. E jäy ajcxy ooy yhuänipy yjihuihuipy ycanaymijotcuyc'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacmínañ:

—Nayguend'ájtigix miich ajcxy, com yi mmídzíp ajcxy xymájtzcixíp, e xycíyéjccixíp ma tungmídpídjic, e xychachytúngixíp xyhuójpccixíp ma yi judíojäy ñaymujctac ajcxy. Xyajníxcixíp mach ma rey etz ma gobernador ajcxy yhuinduu míid íich ycixpi com miich ajcxy xymíbicyich. E miich ajcxy tíy'ajt myegípy míid íich ycixpi, íxti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mína ycíxa'ñ naaxhuiñybi, chi ajcxy capxhuácxtáhuipy íich n'ayuc huindu'myb ñaaxhuiñ ma tüg'óciy naax cajp. ¹¹ Co jäy ajcxy xyajnícxíp mach ma codungdjic co xytíydúngixipy, chi ca' ni nej mjot'adíyib, ni ca' mhuinmayipy nej m'adzóogixipy. Mgápccixipy je ayuc huídibi Dios xymóoygixipy, com je ayuc huídibi mgápccixíp, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydíjic ajcxy ycíyegamyb ma tungmídpí yci'm y'uch ajcxy co huen yaj'ögyii. E nañ jadu'n je ungedeedy ycíyegamy yci'm y'ung ajcxy ma tungmídpí. Nañ jadu'n yi' y'ung ajcxy cíyegípy yci'mdeedy co huen yaj'ögyii. ¹³ May naaxhuiñjäy ca' xychogípy xyjihuihuipy miich ajcxy míid íich ycixpi. Pen miich ajcxy mmíctínaayb ma mmíbíjicín, ypaadíp miich ajcxy m'alma nídzoocín.

¹⁴ Chi Jesús yjacmínañ:

—Co anajty m'íjxcixy je huídibi Daniel ñimiydac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huídibi ooy ycodzigijity. Mich ajcxy huídibi tzinaayb jim Judea, co jadu'n m'íjxcixipy, chi nicx mgueectzooccix ma tungop. ¹⁵ Yi jäy ajcxy huídibi yajpatp ma ytijcnicxy ca' ñicxity tigoty ma ytijc. E ni ti jiiby cayajpidzimipy. ¹⁶ Yi jäy ajcxy huídibi yajpatp camjoty, ca' ajcxy ni-huimbiditye' yjocxy huit huídibi ymüd. ¹⁷ Huin'it xii huin'it tiempo ayo'n pada'ñ je töxyjäy huídibi anajty ti y'ungtzimigy, e nañ jadu'n yi' ajcxy huídib müd y'ung ma'xung yajtzitp. ¹⁸ May'ajt ajcxy mbijctzoohipy ma Dios, co jada jadu'mbi ayo'n ca' ytuniyb yjadüyb ma anajty ytich tiempity. ¹⁹ Yi jadu'mbi xii tiempo jäy ajcxy ayo'n tzaachypi minaxipy yajnaxipy. Ni caminaaxii jäy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaaxii jadüg'oc ycajadüyb jadu'n. ²⁰ Pen ca' Dios capx'aduga'ñ yijiibi ayo'n xii ayo'n tiempo, ca' ni pin chögipy. Per Dios ycapx'adugamyb yijiibi ayo'n tiempo müd je mbijcpidijc ycixpi huídibi Dios ti huin'ixy.

²¹ Co yi jadu'mbi xii tiempo anajty ymiiñ, ca' mmibigipy, pen ji pinjaty xyñimaaygixy: “Ijxcix, cha yajpaady je Cristo”, o “jim'amy yajpaady je Cristo.” Ca' mmibíjccixipy jäy y'ayuc. ²² Minip jäy ajcxy huídibi ñayyajnaxaanigixy nej Cristo, e ymináangixipy co capxhuäcxy ajcxy Dios y'ayuc, e ca' yjánchity. Ytunipy ajcxy mij huinma'ñ etz mijpi ijxpejt, ixti jahuin'ñna'ñ je mayjäy ajcxy huídibi Dios ti yhuin'ixy. ²³ Nayquend'ájtigix müd yi

jadu'mbi jäy ajcxy, com jayijp ñch miich ajcxy yi' ti nyajmñdmıydağy.

Nejjada' je Dios y'ung yminiipy jadüg'oc

²⁴ Chi Jesús yjacmınañ:

—Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycähuip, e nañ yücxiip huidijaty mic'ajt mñd tzajpjoty. ²⁶ Je huin'it xñ je huin'it tiempo co jadu'n anajty ytunyii yjadyii, huin'it ajcxy m'ixıpy, ñch je jäy huıdibi tzoön tzajpjoty, co ñch anajty nmıiñich jocjoty mñd tüg'óciy nmic'ajt n'oy'ajtich. ²⁷ Co jadu'n anajty nmıiñich, chi mic'amy nguexıpyich ñch n'ángeles ajcxy ma xñ ypidzımy, ma xñ ycidägy, ma jımboj ypidzımy etz ma tıchpoj ypidzımy. N'ángeles ajcxy yajmuga'ñ tüg'óciy ñch njäy, huıdibi ti nhuin'ixyich, xım yam ma ajcxy yajpaady ya naaxhuiñ, etz jiıby tzajpjoty.

²⁸ Chi Jesús yjacmınañ:

—Jëb miich ajcxy tıy'ajt mbıgıpy ma yi hıgueri jadu'n nej je xñ je tiempo mimb cıdaacni. Co je hıgueri jadüg'oc ññhuamıy, chi miich ajcxy mnejhuıy co ti yhuıgonı mına ypottıgııyñi. ²⁹ Nañ tim jadu'n co m'ixıpy tunıyb yjadıyb tüg'óciy iıxpejt nej ti nnımaaygıxy, chi mnejhuıhuıp co ti yhuıgonı je tiempo mına nhuımbıdıpyıch jadüg'oc ya naaxhuiñybi. ³⁰ Janch ñch miich ajcxy nmıäy co jada huıdibi ti nnımydacyıch tunııb jadııb ca'ni anajty y'öctay je jäy ajcxy huıdibi jacjogy'ajtp jadachambı xñ jadachambı tiempo. ³¹ Je tzajp etz je naaxhuiñybi cıxıpy tıgoyıpy. ñch n'ayuc huıdibi ngapxyıch, ca' ycıxıpy ytıgoyıpy ni camınaxıı. ³² Ca' ni pın nejhuıy je xñ je tiempo

mına ytuna'ñyii yjada'ñyii jadu'n nej ti ñich miich ajcxy nnimaaygixy. Ni je ángeles ajcxy jiiby tzajpjoty ca' nejhuñygixy, nañ ni ñich, Dios y'ung', ca' nejhuñyich. Jëyi Dios Teedy tügpajc nejhuñy.

³³ Ni'ixi' ahuñxcix. Mibijctzoogix Dios jabom jabom, com ca' mnejhuñygixy mına anajty ytuna'ñyii yjada'ñyii yi huidibi ti nyajnimaaaygixy.

³⁴ Yi xii yi tiempo huidibi minip jadu'n nipaady nej tüg comeñyjäy huidibi ñicxa'ñ ma tüg it lugar huidibi jigüegy yajpatp. Jayijp ca'ni anajty chooñ, chi yajnibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc' aguu.

³⁵ Ni'ixi' m'idipy miich ajcxy. Com ca' mnejhuñygixy mına je codijc yhuimbida'ñ ma ytijc, pen namgodziy, o mij coodz, o moñi, o ma anajty ti yximiiyñi.

³⁶ Ca' jécyty co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi ñich miich ajcxy ti nyajnimaaaygixy, nañ jadu'n nimäyich tüg'óciy jäy co huen ajcxy nidüg'óciy ahuñxcixip ni'ixi' je xii je tiempo mına nhuimbidiyich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mına ajcxy tzajcaagy cay huidibi ca' levadura miiidity. Je judío teedy ajcxy huidibi jacmijtungmiiid etz je escribas ajcxy huinma'ñ'ixtaaygixy nej jëb ameech májtcixipy

Jesús, e yaj'ögaangixy, ca'ydi je mayjäy nejhüy.
² Chi ajcxy ñayñimayî miñ xyipy:

—Ca' y'óyity co nmájtzim Jesús xijoty. Com ca' yjécyity co je mayjäy yjotmátcottáhuipy, e ytigíhuip huambi jihuuyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huídibi anajty ymíid nübüd pa'm. Jesús iñaayb anajty ma caydac co ymiiñ tüg töxyjäy míid tüg tzaadüdz quiig ujtz míid perfume huídibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogy Jesús je perfume huídibi ooy oy yxuugy. ⁴ E nijéjity jäy ajcxy huídibi anajty jim, ca' anajty ajcxy yjotcújcity míid huídibi je töxyjäy ti tuñ, e ñayñimayî ajcxy miñ xyipy:

—¿Nej jada co ocyaj'ayooni yi perfume huídibi ooy oy yxuugy? ⁵ Jac'oy co ixypy yajtoogy yi perfume tugiig migo'px peexy, jigix yajpubedipy ayoobtijc.

E ca' jadu'n ajcxy tim jäygidacy nej je töxyjäy ytuuñ míid Jesús, chi ix'ojy ajcxy je töxyjäy ayooob.

⁶ Chi Jesús ymíinañ:

—Ixmajtzci x jada töxyjäy. ¿Nej co m'amayiygixy? Yi huídibi ti tuñ míid íich, ooy yi' y'óyity. ⁷ Je ayoobtijc ca' ytigoy'idipy ma miich ajcxy nimíina. Huen huídibi xii huen huídibi tiempo jéb mbubedip ajcxy ayoobtijc. Per íich ca' n'ida'ñich ya jecy míid miich ajcxy. ⁸ Jada töxyjäy ti tuñ míid íich jadu'n nej ti ymadägy. Yi' ti pidägy ma íich nninícx perfume huídibi ooy oy yxuugy.

Yi' jipp'ijxpy mina naaxtigihua'ñich. ⁹ Janch ñich miich ajcxy nimaaygixy co huen yma'ámyity ya naaxhuiñ ma anajty yaj'ñihuäcxy yajcapxhuäcxy jada ayuc jada tiy'ajt huidibi ñidzoocin mñid, yajnimiydägipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy mñid ñaygapxyii je teedy mïjtungmñidpi nej jëb cïyeycy Jesús ma yi teedy ajcxy. ¹¹ Co je teedy mïjtungmñidpi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugñy. Chi ajcxy Judas meeñ yajhuinhuanñy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xñijoty

¹² Chi paty je mij xñi mina je xñi'ajtpidijc tzajcaagy cay huidibi ca'p levadura mñidity, e yaj'öccixy je cöbixy huidibi ajcxy yajhuindzigñyib anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixñiyim je pascua xñi adzu'ajtín?

¹³ Chi Jesús quejxy metz ydiscípulos ajcxy capjoty, chi nimay:

—Jim mñid mnaybadñyib tüg yëydijc huidibi ñi tzimñicxp ma tüg majt. Miich ajcxy mbanicxñyib je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuiipy je codijc: “Je Huindzin Jesús ñejhuihuam ma miich mñidity tüg cuarto ma je Huindzin Jesús mñid ydiscípulos ajcxy jëb caaygixy yi pascua xñi

adzu'ájtín.” ¹⁵ Je codíjc cì'm xyajni'ixíygixyip tüg cuarto mijpi ma je mímetz piso huídibi tí yajni'ixíy. Ma yíjimbí cuarto miich ajcxy mni'ixíhuipy yí pas-cua xí adzu'ájtín.

¹⁶ Chi je metz Jesús ydiscípulos ajcxy tüyöychooñ. Co ajcxy yja'ty cajpjoty, chí ajcxy paty je cuarto, tím jadu'n nej Jesús jayíjp ymíñañ. E jím ajcxy ni'ixíy je pascua xí adzu'íbi.

¹⁷ Nam coodziyñí anajty co Jesús yja'ty ma je cuarto míd jacjadyí ydiscípulos ajcxy. ¹⁸ Co anajty jím ycaaygíxy ma je caydac, chí Jesús ymíñañ:

—Janch ích miich ajcxy nímay co nidüg miich ajcxy huídibi cham caayb míd ích, xycíyegaambích ma nmídzípích.

¹⁹ Co je Jesús ydiscípulos jadu'n mídooy, chí ooy ytigíy tajpi maybí ajcxy, e ñay'amídoohuígíxy miñ xyípy, e tüg ymíñañ:

—¿Nej ích jada'jí?

E jadüg ymíñañ:

—¿Nej ích jada'jí?

²⁰ Chi Jesús ymíñañ:

—Yí' yí' nidügtí yí nimajmetzp huídibi tocxmujcp míd ích ma tügpi texy. ²¹ Pues janch ích je', je jáy huídibi tzoón tzajpjoty, nbadaamybích tza-achypí ayo'n jadu'n nej yjaybétyíty ma yí Dios ñecy. Per mij ayo'n pada'ñ je jáy huídibi xycíyegaamích ma ích nmídzíp. Jac'oy co ca' ycadímma'xung'ajty jada yëydíjc.

²² Caayb ajcxy anajty, co Jesús conígy tüg tzaj-caagy, e jayíjp yajnax Dioscojuyip ma Dios, e chí tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chí ymíñañ:

—Caaygix jada tzajcaagy. Jada tzajcaagy ñich jada nninix.

²³ Chi Jesús conígy je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. ²⁴ Chi Jesús ymíñañ:

—Jada ügy ñich nni'py'ajtpy huídibi temamb yogamb. Je' jada jemybi Dios ycötújcín huídibi Dios yejc mñid jäy ajcxy ycixpi. ²⁵ Janch tñy'ajt jadu'n nej ñich miich ajcxy nimaaygixy, co ca' jadüg'oc n'üga'ñich vino ñi, ixti cooni anajty njädyich tza-jpjoty ma yi Dios y'ane'my.

Jesús capxpídzimy co Pedro ymíña'nañ co ca' y'ixy'adyii

²⁶ E co Jesús etz ydiscípulos ajcxy ñy tüg himno, chi ñicxy ajcxy ma je cop huídibi xñijp Olivos.

²⁷ Chi Jesús ymíñañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuij.” ²⁸ Per co ñich anajty njugypícyich jadüg'oc, co ñich anajty ti n'ögyich, nícxibich jim Galilea jacjayijp, ca'ydí miich ajcxy.

²⁹ Chi Pedro Jesús nimaayi:

—Oy ixypy yi jacjadyii miich mdiscípulos ajcxy xycöguectäy, per ñich ca' miich ngöguëga'ñ.

³⁰ Per Jesús nimay Pedro:

—Janch tñy'ajt jadu'n nej yam nimäy, jadachambi coodz ma ca'ni anajty tzeyyaxigy mejtz'oc miich xycoyüdz'a'ñich tugig'oc, míña'nañ co miich ca' xy'ixy'adyiijich.

³¹ E Pedro ca' anajty cöbigañ nej Jesús ymíñañ, chi mictägy mínañ:

—Ca' ñich miich ngoyüdzañ, oy ixypy ndim'o'cich quipxy mïd miich.

E ñañ actim jadu'n jacjadyi Jesús ydiscípulos ajcxy ymíñañ nej Pedro ti ymíñañ.

Jesús mibijctzoy Dios jim Getsemaní

³² Jesús mïd ydiscípulos ajcxy oyja'ty ma tüg it huídibi xíjip Getsemaní, chi Jesús je ydiscípulos ajcxy nimay:

—Ñña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús mïd nicxy jëda'ajty Pedro, Jacobo etz Juan ma tüg it ahuingujc. Chi Jesús ytiñy tajpi maybi jihuñy jotmay. ³⁴ Chi Jesús ymíñañ:

—Njihuñyich tüg jotmay nej n'ögañich. Huímgix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixypy ca' minaxy yajnaxy je tzaachypi huídi anajty ypadamy je huin'it hora.

³⁶ E Jesús anajty Dios mibijctzoy ymíñañ:

—Dios, mïd miich ca' ni ti chípity. Píjicigich jadaabí tzaachypi ayo'n, per ca' yjadú'nity nej ñich ndzójcin, huen tuñyí jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymí'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadägañ m'idipy juugy tüg hora? ³⁸ Jugy'íjtcix, e mibijctzoogix Dios ca'ydi jibictuuyb mdigñyixy.

Janch t̄iy'ajt co jotjoty ooy mnijot'ájt̄c̄ixy mdunaanḡixy ȳi oybi. Per ȳi mnin̄ic̄x oy amaaȳity.

³⁹ Chi Jesús jadüg'oc huinhuäct̄uuty je' ydiscípulos ajcxy, e jadüg'oc ñ̄ic̄xy Dios m̄ib̄ijct̄oob. May'ajt pījct̄zoy tim jadu'n nej je jaȳijp'atyp̄i anajty ti ym̄ina'ñ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátc̄ixy ti anajty ym̄i'öcc̄ixy, com ca' ajcxy m̄imadägy m̄ähūi, e ni ca' ajcxy jajty nej adzohuipy Jesús. ⁴¹ Miduḡüg'oc Jesús ñ̄ic̄xy ma je' ydiscípulos ajcxy, e ym̄ina'ñ:

—¿Nej ya m̄jacm̄áaḡixp m̄jacpooxc̄ixp? Maaḡix pooxc̄ix jadachambi. Ti m̄īd jadu'ñ̄ȳi. Ti je tiempo huaad'ájt̄ni m̄ina ñ̄ch, je jāy hūidibi t̄zoon tzajpjoty, xyc̄iyeḡipy ajcxy ma ȳi j̄ib̄ic jāȳdj̄c. ⁴² Mayb̄id̄iḡc̄ix, tzoc jām̄im. Chi ym̄iñ je jāy hūidibi xyc̄iyegaamb̄ich ma nm̄idz̄ip̄ich.

Mach ajcxy Jesús yajñ̄ic̄ixy

⁴³ Capxp anajty Jesús, co Judas oyjäty ma Jesús yajpaady. Judas hue' je' nidüḡti je majmetzpi hūidibi Jesús yhuin'ijx. Judas m̄īd m̄iñ mayjāy hūidibi ajcxy m̄īd pujx etz quipy. Je teedy m̄j̄tungm̄īdp̄i, je escribas ajcxy, etz je m̄ijj̄ȳdj̄c ajcxy ti anajty quexy je mayjāy hūidibi anajty madzamb Jesús. ⁴⁴ Judas, je hūidibi anajty c̄iyegamb Jesús, hue' anajty jaȳijp̄ ti moy je mayjāy t̄üḡ ijxpejt hūidibi m̄īd j̄eb̄ ajcxy ijxcabip Jesús. Jadu'n jaȳijp̄ Judas ycapxytuñ m̄īd ȳi' ajcxy, e ym̄ina'ñ:

—Je jāy hūidibi anajty ndz̄üc̄yp̄ich, ȳi' je' anajty Jesús. Madz̄ipy ajcxy, e myajñ̄ic̄ixp miich ajcxy yajxon cuend'aty.

⁴⁵ Mic'amy co Judas oyjädy ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n yminañ, chi Judas Jesús tzücxý. ⁴⁶ Chi mic'amy je mayjäy Jesús mach, e yajnicxy ajcxy mach.

⁴⁷ Per nidügti Jesús ydiscípulos juudy ypujxy ma ytijc, chi je teedy mïjtungmïidpi tüg ytumbi yajtzaachiyi, quejtzpujxi tüg ytätzac. ⁴⁸ Chi Jesús je mayjäy nimay:

—¿Ti co miich ajcxy xyñimiiñich mïd pujx etz quipy, jadu'n nej jihuiy ïich tüg meetzpi? ⁴⁹ Jabom jabom nyaj'ixpijcyich jäy jilby ma Dios ytijc ma miich ajcxy myajpaady, e ni ca' miich ajcxy xy-majchich. Paady jadu'n ytunyii yjadyii jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jäy mutz'anägnip huidibi quectzög

⁵¹ Per tüg yujcyeeg anäg huidibi anajty payöy Jesús nímóchity anajty mïd tüg sábana. Chi Jesús ymidzip ajcxy majch je yujcyeegpi. ⁵² Chi je yujcyeegpi c'queegtuty je mayjäy, yajhui'my ysábana, e yquecytzögy nihuädz ixhuädz.

Jesús mij juntijoty

⁵³ Chi ajcxy yajnicxy Jesús mach ma je teedy mïjtungmïidpi yajpaady. Chi mic'amy ñaymujci tüg'óciy teedy ajcxy huidibi mïjtungmïidpi, e tüg'óciy mijjäydijc, etz tüg'óciy escribas ajcxy. ⁵⁴ Chi Pedro jigüegy anajty panicxy je mayjäy ajcxy ixti oy yja'ty ma je teedy mïjtungmïidpi

ytiba'. E jím ixtacy quipxy m̄id policía ajcxy agujc, yxaamgixy anajty ma j̄inba'.

55 Je teedy ajcxy m̄itungm̄idpi etz t̄üg'óc̄iy je judíoj̄y ytungm̄idpi ajcxy yhuinma'n̄'ixtaaygixy nej ajcxy j̄eb Jesús yajpocyca' m̄id ajcxy yx̄ihuín, e jadu'n j̄eb mooygixy yi öc̄in. Per ca' ajcxy paady huinma'n̄. 56 Mayj̄y n̄ihuambejty Jesús m̄id an̄i, e ca' ajcxy y'ayuc yt̄üḡiy. 57 Nij̄ej̄ty j̄y yt̄inaȳigy juntajoty, e n̄ihuambety ajcxy Jesús, ym̄inaangixy:

58 —Ich ajcxy am̄ido'ijt Jesús y'ayuc t̄üḡ t̄ecy, co jadu'n ym̄inañ: “Njidaamyb̄ich jada Dios yt̄ijc huídib̄i j̄y ti cójc̄ixy, e coduḡiḡ x̄i gojt̄igadzip̄ich huingb̄i huídib̄i ca' j̄y cojy.”

59 Per ni ca' yt̄üḡiy ajcxy y'ayuc nej ajcxy Jesús n̄ihuambejty, ac t̄igachjaty nid̄üḡ nid̄üḡ ym̄inañ ajcxy.

60 Chi je teedy huídib̄i je jacm̄itungm̄id yt̄inaȳigy juntajoty, chi y'am̄idooy Jesús e n̄imay:

—Jesús, ¿ca' nej m'adzohua'n̄iyi? ¿Ca' mm̄idooy nej xychachx̄igixy?

61 Per Jesús am̄oñ y'ijty. Ca' ti ayuc adzohuimb̄i-jty. Chi je teedy jad̄üg'oc̄ m̄igapxy Jesús n̄imay:

—¿Nej miich je' je Cristo, je Dios y'ung?

62 Chi Jesús ym̄inañ:

—Janch jadu'n, ich je' je Cristo, je j̄y huídib̄i tzoön tzajpjoty, e miich ajcxy xy'ix̄ip̄ich ñ̄ñ̄aȳich ma je m̄ijpi Dios ym̄ijc a'oy'amy. Nañ jadu'n xy'ix̄ipȳich miich ajcxy jocjoty co anajty nhuimb̄itȳich jad̄üg'oc̄ ya naaxhuiñ.

63 Chi je teedy huindzech huinhuocy yci'm yhuit, je' je' t̄iy'ájt̄ip̄ co ca' anajty yjotc̄újc̄ity m̄id Jesús y'ayuc, chi ym̄inañ:

—¿Ti testigo njac-huaanim? ⁶⁴ Miich ajcxy ci'm ti mmidoogixy yi' y'ayuc, jadu'n nej ycapxtigoy miid Dios. ¿Nej miich ajcxy minaangixy?

Chi nidüg'óciy ajcxy ymínañ co janch jadu'n Jesús mij oy ti ycapxtigoy miid Dios ytiy'ajt, paady huaad mooygixy yi o'cin.

⁶⁵ Chi nijéjity jáy yhuindzujígy Jesús. Chi ajcxy huingoxodziy, cójxcixy, e chi ajcxy nimay:

—Octiygapx. ¿Pín ti xycojxy?

E je policiatjic ajcxy cojxy Jesús ma yhuiñyjijp.

Pedro ycoyüch Jesús

⁶⁶ Pedro tibäy anajty y'ahuixy. Chi ñimijhuäci tüg tumbi töxyjäybi huídibi anajty tumb ma je teedy ytjic. ⁶⁷ Co je töxyjäy ijxpaty Pedro ññäy anajty jünba'áy, yxaamb anajty. Chi huindícxpejty Pedro, e nimay:

—Miich nañ miidhuídijtpy anajty je Jesús yi Nazaretpi.

⁶⁸ Per Pedro ca' cöbijcy je töxyjäy y'ayuc, e ymínañ:

—Ca' n'ixy'adyiijich jada Jesús. Ni ca' nhuinjihuñyich ti miich nimíydacpy.

E mic'amy Pedro ypidzimy jiihy, e tim huin'ítiy tüg tzeyñi'aa oy yaaxígy. ⁶⁹ Chi jadüg'oc je tumbi töxyjäybi huindícxpejty Pedro, e nimay je jáy ajcxy huídibi jim yajpatp huingon, e ymínañ:

—Jada je' nidügti huídi anajty miid huídity Jesús.

⁷⁰ Chi Pedro jadüg'oc ymínañ co ca' ix'adyii. Co hueeñi, je jáy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jáy miich, com nmídooybich miich m'ayuc nej Galileo jáy ycapxcixy.

⁷¹ Co ajcxy jadu'n ymīnañ, chi Pedro mictägy ñaygogapxi co ca' yi' mīdhuidity Jesús, ymīnañ:

—Dios y'ijxpy ñejhuiyb co tiy'ajt ngapxyich, co ca' n'ixy'adyiijich yi' Jesús huīdibi miich ajcxy mni-gapxyp.

⁷² Co Pedro ycapxymaayi tim huin'itay tüg tzeyñi'aa yaaxigy mīmejtz'ocpi. Huin'it Pedro jäymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxigy metz'oc, ti anajty miich mīna'ñ tugīg'oc co ca' xy'ix'adyiijich.” Co Pedro jadu'n jäymetzcoody Jesús y'ayuc, chi tajy may ñayjihuiyi, e ytiğiyy yaaxpi.

15

Jesús ma Pilato yhuinduu

¹ Co yximıy, chi je teedy ajcxy huīdibi mij tung mīd, je mijjäydic, je escribas ajcxy, etz tüg'óciy judíojäy huīdibi mij tung mīd yöymujctay ajcxy. Chi nidüg'óciy ajcxy yajnicxcixy Jesús cıxoch ma Pilato, je gobernador. ² Pilato Jesús y'amidooy, nımay:

—¿Nej miich rey'ajtp ma yi' judíojäy ajcxyi?

Chi Jesús ymīnañ:

—Mīich jadu'n mīnamb.

³ Je judío teedy ajcxy huīdibi mijtungmīdipi mictägy tzachxıgıxy Jesús mīd canaagnax xıhuın.

⁴ Chi Pilato jadüg'oc Jesús y'amidooy, nımay:

—¿Ca' nej m'adzohua'ñi? Ix nej yi' mmıdzip ajcxy xychachxıgıxy.

⁵ Chi Jesús ca' ni nej y'adzooy. E Pilato ooy chachhuınmay'ahuıdıjty.

Jesús yajmoy ysentencia co y'ögıpy

⁶ Com xiījoty anajty, je gobernador Pilato najtzmadz̄īy t̄ug machyj̄äy, je hūidibi je mayj̄äy anajty ypijctzoogixyp. ⁷ Pujxtijc iñaāyb anajty jim Jerusalén t̄ug machyj̄äy hūidibi anajty yxī Barrabás. Barrabás pujxtijc iñaāyb anajty quipxy m̄id jacjadyii jāy hūidibi anajty ti m̄idziptzoon je gobierno romano, e ti anajty yj̄äyyaj'ó'ccixy. ⁸⁻⁹ Co anajty je may yxī'ajtpidijc may'ajt pijctzoogixy ma Pilato co najtzmadz̄ihūip t̄ug machyj̄äy, chi Pilato ym̄inañ:

—¿Nej mdzojccixyp co nnajtzmadz̄ihūibich je judíōj̄äy ajcxy yrey?

¹⁰ Pilato ñejhūīyb anajty co mañ'ajtinḡixy anajty ajcxy je teedy m̄ijtungm̄idpi ti ciyejccixy Jesús. ¹¹ Per co Pilato jadu'n ym̄inañ, chi je teedy ajcxy m̄ijtungm̄idpi ooy ajcxy yajhuamgoty yajjihuiygoty je mayj̄äy co huen je Pilato najtzmadz̄īy je Barrabás. ¹² Chi Pilato y'am̄idooy je mayj̄äy jad̄üg'oc:

—¿Nej miich ajcxy mdzocy ndunipyich m̄id jada ȳydījc hūidibi jāy ajcxy ytijpy co yrey'aty ma yī judíōj̄äy ajcxy?

¹³ Chi je mayj̄äy mic ym̄inangottay:

—Yajcruutzpet.

¹⁴ Chi Pilato ym̄inañ:

—Per ¿ti yī ti tundigoy?

Huin'it je mayj̄äy n̄igi mic ym̄inañ:

—¡Yajcruutzpet!

¹⁵ Co jadu'n je mayj̄äy ajcxy m̄ictägy ym̄inanday, chi Pilato anajty yajjotcujc'adaangixy je mayj̄äy, chi najtzmadz̄īy je Barrabás. E co yajc̄i'ajttay yī Jesús, chi ciyejcn̄i co huen yajcruutzpedyii.

16 Chi je soldados ajcxy yajnicxy Jesús ma je agujctijc tiba', e jim ñaymujci tüg'óciy soldados ajcxy huídibi yajpatp anajty jim Jerusalén. 17 Chi ajcxy yajnijenñiy je Jesús tüg rey yhuit, color ucypí e yajcojenñiy ajcxy apy corona. 18 Chi je soldados ajcxy ymíñañ:

—¡Viva jada judío rey!

19 Chi je soldados ajcxy huoippy Jesús ma ycohuajc mñid paxy, e huindzuj jįptzujcixy ooy, e huingoxtinay'ahuñiygixy janch ypaad nej jihuñy ooy huindzigñiygixy. 20 Co je soldados ajcxy nixiictay yajxiictay Jesús, chi ajcxy jeeni je yreyhuit color ucypí, e yajnijenñiy ajcxy yci'm yhuit jadüg'oc. Chi ajcxy Jesús mñidcajppidzimy co anajty yajcruutzpedaangixy.

Co Jesús yajcruutzpejti

21 Tü'am ajcxy tüg jāy mñidnaybati, hue' anajty yxñi, Simón, ycoğájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

22 Chi ajcxy yajnicxy Jesús ma tüg it lugar huídibi yxñi Gólgota, je ayuc Gólgota jadu'n yhuimbizimy o'cpi cohuajc. 23 Chi ajcxy moy Jesús vino huen ügy tem huídity mñid mirra tzoy. Per ca' Jesús cöbijcy je vino nñi. 24 Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocjē'ajtíp.

25 Petyxñi anajty co ajcxy yajcruutzpejty Jesús.

26 Je ayuc huídibi ajcxy yjaay ma Jesús cruudz, jadu'n ymíñañ:

—Je judíoꝝäy ajcxy yRey. ²⁷ Quipxy miid Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymiꝝc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ymĩnañ: “Yaj'amĩchoomujc je Cristo miid je pocyjäy ajcxy.”

²⁹⁻³⁰ Je mayjäy huĩdibi ajcxy naxiꝝyb anajty ma Jesús yajpaady cruutzcíxy, ooy anajty ajcxy ycoꝝjiꝝyñ, niꝝiicy yajxiicy ajcxy Jesús, ymĩnañ ajcxy:

—Bah, miich huĩdibi Dios ytĩc mjidaanip, e co-dugĩg xi huĩngbi myajpidĩga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy miꝝtungmiidpi etz je escribas ajcxy niꝝiicy yajxiicy ajcxy Jesús ñayñimayi miñ xyipy:

—Jada Jesús ti cohuañ jacjadyiĩ jäy, e ca' jaty nej ci'm ñaygohua'nĩyb. Pen janch, co jada Jesús yjẽjty je Cristo huĩdibi rey'adamb ma yi judíoꝝäy ajcxy, ymiid ixipy mic'ajt jaydẽb ci'm yminagĩpy cruutzcíxy. Co jadu'n ixipy n'ĩxim co ci'm ti yminacy cruutzcíxy, huin'it miĩbĩcim co janch jada jẽjty je Cristo huĩdibi rey'ajtp ma yi Israel jäy.

Nañ jadu'n je metz meetzpi ajcxy huĩdibi cruutzpejt quipxy miid Jesús niꝝiicy yajxiicy ajcxy je Jesús.

Co Jesús y'ögy

³³ Co ycuꝝcxĩjĩy, chi ycoodziygĩday tũg'ócĩy naaxhuiñ. E jadu'n je naaxhuiñ y'ĩjty coodzixti minacyxiĩ. ³⁴ Minacyxiĩ Jesús mic ymĩnañ miid aramaico ayuc:

—Eloi, Eloi, ¿lama sabactani? —yí jadu'mbi ayuc hue' yhuimbidzimy: Tat Dios. Tat Dios. ¿Na'amy co ti xy'ix'ixyich?

³⁵ Nijëjity jäy huídibi anajty jim yajpatp huington ma Jesús, co midoo jadu'n ajcxy Jesús y'ayuc, chi ajcxy ymíñañ:

—Midoogix, Elías yí' yaaxtaayb.

³⁶ Chi nidügti ajcxy ninicxy Jesús poyigy, ti anajty yajxoogy pixy mïd vinoní ta'mbi, e yajjijpxodziy je pixy ma tüg paxy, e jadu'n yajja'ty je vino nî ta'mbi ma Jesús y'ahuac, huen muucip je vino nî ta'mbi. Co jadu'n tuñ, chi ymíñañ:

—Tzoc oc'ahuíxim pen mimb Elías, e miñ yajminagyii ma yí cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tinä'amy huídibi anajty mïd y'adiydútyity je Dios ycuarto ma je teedy mijtungmïdipi ytigy tüg tecypajc jimijt jimijt. ³⁹ Je soldado huindzin huídibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi ymíñañ:

—Janch co jadayaabi yëydijc anajty Dios ung'adyii.

⁴⁰ Nañ jim anajty nijëjity töxyjäydijc ymij'íjxcixy jiguëgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé.

⁴¹ Jadayaabi töxyjäy ajcxy mïdhuídijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huídibi anajty ti ycoody jim Jerusalén quipxy mïd Jesús.

Jesús yajnaaxtig'iyi

42-43 Paady co chu'iyñi hue' anajty viernes mina judíojäy ñayyajpocyñihuáatzigixy, jaydëb anajty amay'adaangixy je sábado xii je com jabom. Chi José huídibi anajty cogajp Arimatea yjotmictuñ, chi ytig'iy ma je gobernador Pilato, pijctzooy may'ajt co yajnaaxtig'ihuaani Jesús ñin'icx. E hue' je' José anajty tungm'iid ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huodzooy je soldado huindzin, e tiy'ajt pijctzooy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtig'ihuipy Jesús. ⁴⁶ Chi José juy poob huit, e co yajminajcy Jesús ñin'icx, chi mo'ñ m'iid je poob huit, e chi pidacy ma tüg tzaajut huídibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut m'iid tüg mij tzaa. ⁴⁷ E je metzpi töxyjäy María Magdalena etz je jadügp'i María huídibi José ytaj'ajtpy huind'icxp anajty ajcxy co Jesús ñaaxtig'iy.

16

Jesús yjugypijcy jadüg'oc

¹ Com jabom jopy, domingo, chi je tug'ig töxyjäy ajcxy María Magdalena, María Jacobo ytaj etz Salomé juy ajcxy tzoy huídibi ooy oy xuugy, pidägaangixy anajty ma Jesús ñin'icx. ² Je tug'igpi töxyjäy chooñ domingo, seaman ixtigi', tim jopyñi. Ti anajty ypidzimni je xii co ajcxy oyjady ma je öcpi

jut. ³ Chi je tugigpi töxyjäy ajcxy nayñimaayi miñ xyipy:

—¿Pin xy'ocpubéjtim jigihupy je mij tzaa huídibi mïd agiiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiaguejcnäy huídibi je öcpi jut anajty agiiydujcp. ⁵ Chi ajcxy ytiгий jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymïd. Co ajcxy jadu'n ijxy je yeeg'anäg jii by jutjoty, chi je töxyjäy ajcxy ooy chigiiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huídibi cogajp Nazaret, je huídibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yi jacjadyii Jesús ydiscípulos ajcxy co Jesús nícxip jayijp jim Galilea, e jim Galilea ñaybadiiyb ajcxy mïd Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy mïd tzig'iñ. E ni ca' ajcxy nimay ni pin nej anajty ti ijxcixy, com ooy anajty chigiiygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huídibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huídibi mïd yhuídijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos

ajcxy ooy anajty ytájycixy ymáygixy etz yaaxcixy.
 11 E co ajcxy midoohui je María y'ayuc, co anajty ti
 ixyc Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

12 Co hueeñi, Jesús ñayguëxici nañ jadu'n ma
 metz je' ydiscípulos huidibi ñicxp anajty ajcxy
 camjoty. 13 Chi je metzpi discípulos ñicxy ajcxy
 mic'amy oy nimaaygixy je jacjadyii discípulos
 ajcxy co ti íjxcixy Jesús. E je jacjadyii discípulos ca'
 ajcxy mijpidaaci je metzpi discípulos y'ayuc.

Huidi Jesús ydiscípulos yajnibijc

14 Jac com jecy, Jesús ñayguëxici ma je majtügpi
 discípulos ajcxy ma anajty y'ñaaygixy ma caydac.
 Chi Jesús ogy ajcxy co ca' ajcxy mibijccixy co ooy
 ajcxy yjot yjuuñity, ca' ajcxy mijpidägy jacjadyii
 pin anajty ti y'íjxcixy Jesús. 15 Jesús je' ydiscípulos
 ajcxy nimay:

—Níxcix miich ajcxy ma tüg'óciy naaxhuiñyäjy,
 ma tüg'óciy naax cajp, e capxhuäccix ajcxy
 je oybi ayuc nej jäy ajcxy jëb y'almanidzögipy.

16 Pinjaty mibijc etz ñibejtciy, ypaadip ajcxy
 y'almanidzoocin. Per, pinjaty ca' mijpidägy tiy'ajt
 hue' ajcxy y'alma tigoyip müd ypocy ycixpi.

17 Yi jäy ajcxy huidibi mibijcp, ooy ajcxy ijxpejt
 túngixipy. Müd ich nxii ich nmic'ajt yajpidzimipy
 ajcxy ca'oybi ma jäy ajcxy yjot yhuinma'ñ. Nañ
 jadu'n ycápxgixipy huingbi ayuc. 18 Ymadzipy
 ajcxy tza'ñ, e ca' nej yjajtcixipy. E co ajcxy veneno
 ügip, ca' ajcxy ypa'mdunib. E co ajcxy cñixáipy
 pa'mjäy, tzögip je pa'mjäy.

Jesús ypätigiyñi tzajpjoty

19 E co je Huindzin Jesús ycapxy ycijxy mïid je' ydiscípulos ajcxy, chi ypätig#yñi tzajpjoty. Jiiby tzajpjoty Jesús yajpaady ma Dios ymijc a'oy'amy, mïid mij'ane'min. 20 Chi Jesús ydiscípulos ajcxy chooñ ñícxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypudig#iyi, mic'ajt moy je' ajcxy mïid je ijxpejt je mijhuinma'ñ huídibi ajcxy tumyb. Jadu'ñyi jadu'n. Amén.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

4190de74-18ab-52cf-ba4e-5f99ab05892f